

Retiŕuhu Hin Iesu Kŕisto

Mark

Mo Ulia

Puku Nike

Tamlohi hai la lo ŕomŕomia lara John Mark natu mo ulia, hara sei Paul mo lavia hitahu na nona tiroma hahau (Acts 12.25). Mo ulia na sava vavahinau Iesu mo lo vaira: Tiroma Iesu mo viŕoni tamlohi mo vati vara la usuria (1.16-20), moiso mo pa tapulo vai na hina maŕurahi, mo titiu naŕihi na tanume sasati na tamlohi matea (1.21-28), mo tueni vepalihan Peter (1.30-31), vao tamlohi rojoa (1.32-34), peresi na tamlohi lepros matea (1.40-45), Iesu mo vai na hinau tari nike na suihan God.

Haratu la lo tiroma na Jew la ŕohu hin Iesu mata nona retireti (2.2-3.6), ale la aleale malele vara la pa vilimateia hinia (11.18). Tanume sasati la hitevosahi na suihana, la levosahia vara enia Natun God tataholo, pani Iesu mo reti horora vara la sopo mele vereea isana tamlohi hin rani atu.

Ŕa eŕi hitea vara ŕomŕomi tavera non Mark enia vara Iesu enia tamlohi matea mo lavi na rani ŕilangi matan enia Jujuri atu sei God mo ŕulea mo sinai na varama, enia Natuna tataholo (8.31-33; 9.30-31; 10.33-34), Tamlohi atu Pŕovet Daniel mo lo vereea tuai jea moiso (Dan 7.14).

Hinahinau Hin Puku Akerihi

1. Reti Hin John Tamlohi Paptijo (1.1-8)
2. Paptijo Non Iesu, Tiapolo Mo Vaihitea (1.9-13)
3. Iesu Hin Galilee (1.14-9.50)
4. Iesu Mo Sahe Jerusalem (10.1-52)
5. Isoiso Rani Non Iesu (11.1-15.47)
6. Iesu Mo Mele Mauri (16.1-8)
7. Iesu Mo Pala (16.9-20)

John Tamlohi Paptijo
(*Mt 3.1-12; Lk 3.1-18; Jn 1.19-28*)

1 ¹Harihi enia tapulo Retiřuhu hin Iesu Křisto, Natun God.
²Sohen přovet Isaiah mo ulia mara,
 ‘Eh! Ko hitea? Na lo řule na noku vahařule vara i tiroma hiniho,
 i pa vai na malele la tataholo matam.’ *Mal 3.1*
³‘Na jara hasetoho leona mo lo ulo mara:
 Ha vasahi na malelen Moli God!
 Ha tano na malelena i tataholo.’

Isa 40.3

⁴Ale John mo pala, mo lo paptijo na tamlohi na jara hasetoho matan Judea, mo lo retivujavujangi isana tamlohi vara la lavi na paptijo mata posi na hehe matan vara Moli i řomira. ⁵Ale tamlohi tari na lolon Judea peresi Jerusalem, la lo vano vara la hite John, ale enia mo lo paptijo hin la haratu la lo taviti na nora hehe na wai Jordan. ⁶John mo ru na ruru la vaia na vulu camel, ale mo otioti na huri buluk; hana hinau enia hatpoha peresi na tau sugabag sei waina mo meji. *2 Ki 1.8*

⁷Ale mo lo retivujavujangi mara, “Tamlohi matea i pa mai hitahu hiniau mo aulu mo jeuau, enau na sopo tataholo vara a rautoho a lavi nařihi na asi eve palona.

⁸Enau na lo paptijo hin kamim na wai purongo, pani enia i pa paptijo hin kamim na Tanume Tapu.”

John Mo Paptijo Hin Iesu
(*Mt 3.13-17; Lk 3.21-22*)

⁹Hin rani atu Iesu mo tai Nazareth na jara Galilee, mo mai atu ale John mo paptijo hinia na wai Jordan. ¹⁰Iesu mara mo malue na lolo wai, vahatea purongo tuka mo roi, ale John mo hite Tanume Tapu mo sinai atano sohena vomahe matea, ale mo tatau hin Iesu. ¹¹Leon God na tuka mo reti mara, “Engko Natuku řuhuřuhu, enau na opoiho mo tavera jea, na avulahi tavera hiniho.”

Tiapolo Mo Vaihite Iesu
(*Mt 4.1-11; Lk 4.1-13*)

¹²Vahatea purongo, Tanume Tapu mo tiroma hin Iesu vara i sahe na jara hasetoho. ¹³Iesu mo lo toho atu mata rani mo ngavulu vati, Setan mo lo vaihitea. Iesu mo lo toho peresi na maji jala hin jara atu, ale angelo non God la lo matahia.

Iesu Mo Tapulo Vavahinau
(*Mt 4.12-17; Lk 4.14-15*)

¹⁴Mo sopo tuai, Supe Herod mo taurilati John, mo taua na ima řilangi. Ale hitahuna, Iesu mo sivo Galilee, mo lo retivujavujangi na Retiřuhu non

God mara, ¹⁵“Rani tataholo atu God mo lo viřonia mo mai moiso! Mauri atu God mo aulu hinia mo lo mai mariviti. Ha posi na nomim hehe, ale ha rasu Retiřuhu nike!”

Mo Tovi Na Nona Tamlohi Mo Vati

(Mt 4.18-22; Lk 5.1-11)

¹⁶Na rani matea, Iesu mo lo hahau usuri na pahisa tasin Galilee, mo hite Simon enia tasina Andrew, la lo pulahi na tara matea na tasi matan enira tamlohi aleale maji. ¹⁷Ale mo vereea isara mara, “Ha mai ha usuriau. Enau a pa vai kamim ha mai tamlohi aleale tamlohi.” ¹⁸Vahatea purongo, la tinařihi na nora tara la usuria.

¹⁹Iesu mo mele hahau mo vano makomona, mo hite James natun Zebedee, enia tasina John la lo sakele na lolo botira, la lo tulai na nora tara. ²⁰Iesu mo tovira ale vahatea purongo la tinařihi tamara Zebedee na lolo botira peresi na nona volitusi ale la usuria.

Tanume Sasati La Levosahi Iesu

(Lk 4.31-37)

²¹Iesu tolu la tupu vati atu la sahe Capernaum, ale na Sabbath mo unu na ima lotu nona Jew, ale mo lo vujangira. ²²La haratu la lo tapurongo isana, la mařurahi tavera na nona vujangi, matan mo sopo vujangira sohena nora tamlohi vujangi mata leu matea pani sohena tamlohi matea nona vujangi mo sopo te retiusia matana.

²³Hin rani atu tamlohi matea tanume lumiha sasati matea mo lo toho hinia mo lo toho atu hin ima lotu atu, ale mo ulo isan Iesu mara, ²⁴“Iesu mara Nazareth, ko opoia vara o vai na sava isamam? Ko mai vara o komo kamam teni! Enau na levosahia vara engko hare, engko haratu mo tapu non God!”

²⁵Pani Iesu mo savurahia mara, “Ha! O toho malum! O malue isana nakerihi!” ²⁶Ale tanume lumiha sasati atu mo hisuhi řilangi na epen tamlohi atu moiso mo ulo aulu mo malue hinia.

²⁷Tamlohi tari hin ima lotu atu la mařurahi, ale la lo usiusira hasera hinia lara, “Avei, sava nahai? Vujangi paro matea peresi na suiha vahatea mo pala! Ka hitea mo retileu isana tanume lumiha sasati, ale vahatea purongo la oloolo hinia.” ²⁸Ale vahatea purongo retin la nona suiha atu mo řalihi na jara tari Galilee.

Vepalihan Peter

(Mt 8.14-17; Lk 4.38-41)

²⁹Ale Iesu mo malue hin ima lotu atu, mo vano mo unu na iman Simon enia Andrew, enia tolu James enia John. ³⁰Ale vepalihan Simon mo lo juruvi na vatana matan mo sereia mo tavera, ale la vereea isan Iesu.

³¹Moiso Iesu mo mai mo tauri na limana mo saua mo sakele, ale seserei atu mo rovo hinia, ale mo tapulo tatamahuni na hara hinau.

³²Na ravravini rani atu, tamlohi la lavi na tamlohi rojo tari peresi la haratu tanume sasati la lo toho hinira la mai isan Iesu. ³³Tamlohi tari hin taon tavera atu la takonahi na mataruan ima atu. ³⁴Ale Iesu mo vai tihai na rojoa nona tamlohi matuvana, ale mo titiu nañihi na tanume sasati matuvana. Mo sopo sile te masapa vara te tanume sasati i eñi retireti matan enira la levosahia vara enia hare.

Iesu Mo Retivujavujangi Galilee

³⁵Na řalavuhu jea mo pa lo řořoha, Iesu mo turu mo vano hasena na jara hasetoho matea vara i ususi ea. ³⁶Ale Simon tolu la haratu la lo toho peresia la kilau alea, ³⁷ale la tapaia la vere isana lara, “Eh! Tamlohi tari la lo aleho.”

³⁸Pani Iesu mo řaramira mara, “Řa malue! Řa vano hin te vanua tinapua matan vara a eñi retivujavujangi na Retiřuhu isara sohena, matan enau na tai na tuka na sinai na varama matan hinau atu natu.”

³⁹Iesu mo unu role na jara tari Galilee, mo lo retivujavujangi na nora ima lotu, ale mo lo titiu nañihi na tanume sasati.

Tamlohi Lepros Matea

(Mt 8.1-4; Lk 5.12-16)

⁴⁰Tamlohi lepros matea mo mai isan Iesu, mo papaohi isana mo usia řilangi mara, “Vara o opoia, o eñi vaiiau a mele vokevoke.”

⁴¹Iesu mo řomopoia mo tavera, ale mo tau na limana hinia mara, “Na opoia. O mele vokevoke!” ⁴²Vahatea purongo, lepros atu mo tihai, ale mo mele vokevoke. ⁴³Moiso Iesu mo reti řilangi isana, ale mo řulea vano mara, ⁴⁴“O tapurongo! O sopo vere te hinau isan tea, pani o vano o hase vujangiho isana pñis, ale o sile na nom otori sohen Moses mo retileu hinia matan vara la eñi hitea vara ko mele vokevoke.” *Lev 14.1-32*

⁴⁵Pani mo turu mo vano mo lo sorahia, ale nona sorasora mo vano řalihi, ale mo vaia Iesu i sopo eñi mele unu hin te taon tamlohi la sopo levosahia, pani mo lo toho na jara hasetoho ale tamlohi la lo mai na jara tari vara la tapaia atu.

Iesu Mo Řomi Na Hehe

(Mt 9.1-8; Lk 5.17-26)

2 ¹Te rani la vano moiso Iesu mo mele vano Capernaum, ale mo sopo tuai tamlohi lo la vere lara mo mele mai na ima moiso. ²Vila řuhu purongo mo sopo mele te masapa na lolo ima teni na mataruana. Ale Iesu mo lo retivujavujangi na reti non God isara. ³Ale, tamlohi tupu vati la ali na tamlohi papao matea mo mai. ⁴Ale matan la sopo eñi vano mariviti

isana, la sahe aulu na pusa ima, la vai na marole matea mo sivo tataholo hinia, ale la tuhu pa tamlohi papao atu na epana mo sivo na nahon Iesu. ⁵Iesu mara mo hite na rasua hin hinau atu la lo vaia, mo vereea isan tamlohi papao atu mara, “Natuku, na ŋomi na nom hehe.”

⁶Pani tamlohi vujangi mata leu hai la lo sakele atu, la lo vereveera isara hasera lara, ⁷“Mata sava tamlohi nike mo lo retireti sohen haratu? Mo lo vaia sohen enia God. God hasena i eŋi ŋomi na hehe.”

⁸Ale Iesu mara mo levosahia vara la lo ususira hinia isara hasera ale, mo vereea isara mara, “Mata sava ka lo ŋomŋomi na hinau sohen? ⁹Sava hinau mo mele malum vara a vereea isan tamlohi papao nike, ‘Na ŋomi na nom hehe!’ teni a vereea vara, ‘O turu! O viriviri na epam, o hahau!’ ¹⁰Pani matan vara ha pa levosahia vara Natun Tamlohi mo lavi na suiha vara i ŋomi na hehe nona tamlohi na varama, ha tapurongo na sava a pa vereea!” Moiso Iesu mo vereea isan tamlohi papao atu mara, ¹¹“O turu, o lavi na epam, o mule!”

¹²Tamlohi papao atu mo turu vahatea, mo lavi na epana ale mo hahau mo malue na nahora, ale mo vaira enira mo isoiso la maŋurahi ale la tahe na hijan God lara, “Hare mo pete hite te hinau sohen harihi moiso?”

Iesu Mo Tovi Matthew

(Mt 9.9-13; Lk 5.27-32)

¹³Iesu mo mele sivo na pahisa tasi, ale tamlohi tari la lo mai isana, ale mo lo vujangira. ¹⁴Ale mara mo lo hahau atu mo hite Levi natun Alphaeus mo lo sakele na jara mata lavi na takis, ale mo vereea isana mara, “O usuriau!” Levi mo turu vahatea, mo usuria.

¹⁵Hin vutepongi atu na iman Levi, Iesu mo lo hanhani peresi na tamlohi matuvana mata lavi na takis peresi na tamlohi hehe tolu na nona tamlohi usuri, matan tamlohi matuvana sohera la lo usuri Iesu. ¹⁶Pani tamlohi vujangi mata leu peresi na Pharisee lara la hite Iesu mo lo hanhani peresi na tamlohi hehe tolu na tamlohi mata lavi na takis, la vere isana nona tamlohi usuri, lara, “Mata sava mo lo hanhani peresi na tamlohi mata lavi na takis tolu na tamlohi hehe?”

¹⁷Ale Iesu mara mo rongoa mo vereea isara mara, “La haratu epera la lo ŋuhu la sopo opoi na doctor, pani la haratu la rojo purongo. Na sopo mai vara a tovi na tamlohi tataholo pani la haratu la hehe.”

Tapuhoro Na Hanhani

(Mt 9.14-17; Lk 5.33-39)

¹⁸Hin rani atu, tamlohi usuri non John tamlohi paptijo peresi na Pharisee la tapuhoro na hanhani mata ususi. Tamlohi hai la mai isan Iesu, la usia lara, “Mata sava tamlohi usuri non John peresi la haratu la lo usuri na Pharisee la lo tapuhoro na hanhani mata ususi, pani nom tamlohi usuri la sopo tapuhoro na hanhani?”

¹⁹Ale Iesu mo vereea isara mara, “Ka ãomãomia vara la tamlohi atu sei la mai na lahi la pa tapuhoro na hanhani vara tamlohi lahi mo lo toho peresira? Vara tamlohi lahi mo lo toho peresira, la sopo eãi tapuhoro na hanhani. ²⁰Pani rani matea mo lo mai vara la pa lavi naãihi na tamlohi lahi isara. Hin rani atu natu, la pa tapuhoro na hanhani.”

Hina Tuai Peresi Na Hina Paro

Iesu mo mele vereea mara, ²¹“Te tamlohi i sopo eãi lavi te tavalu ruru paro hatea i silivi na ruru tuai hinia. Vara i vaia sohena, tavalu ruru paro atu i pa vaia i maãari tavera i jeu haratu tiroma. ²²Te tamlohi i sopo eãi titisi na waen paro i sivo na jara waen la vaia na huri nani tuai matan waen paro atu i pa sosohi i ãari jara waen atu, ale i pa komoa peresi waen atu matan i pa roro naãihi. Waen paro mo tataholo na jara waen la vaia na huri nani paro purongo.”

Moli Mata Sabbath

(Mt 12.1-8; Lk 6.1-5)

²³Na Sabbath matea, Iesu mo lo hahau role na isa wit matea tolu na nona tamlohi usuri, ale la lo tapulo vesi roto na pere wit. ²⁴Ale Pharisee la vereea isan Iesu lara, “Eh! Mata sava la lo vai na hinau matea mo sopo tataholo vara la vaia na Sabbath?”

²⁵Ale Iesu mo vereea isara mara, “Avei, korong ka sopo lo evi na sava supe David tolu na nona tamlohi la vaia hin rani atu la vejuveju ale la marohati, ²⁶ale sohena sava mo unu na Iman God na rani non Abiathar enia mo lo pãis aulu, moiso mo lavi pereti atu sei mo tapu pãis hasera la eãi hania. David mo hania, ale mo silea isan la haratu la lo toho peresia?”

Lev 24.9

²⁷Ale mo vereea isara mara, “God mo tau na Sabbath vara i tueni na tamlohi, mo sopo taua vara tamlohi la lo toho mata Sabbath. ²⁸Matan haratu, Natun Tamlohi enia mo Moli mata Sabbath.”

Tamlohi Lima Kuti Matea

(Mt 12.9-14; Lk 6.6-11)

3 ¹Na Sabbath tinapua matea, Iesu mo mele unu na ima lotu nona Jew matea, ale tamlohi lima kuti matea mo lo toho atu. ²Ale meresahi non Iesu la lo kilau Iesu vara i pa vai mamahuni tamlohi atu na Sabbath teni, matan vara la pa tuvaia matana. ³Iesu mo vereea isan tamlohi lima kuti atu mara, “O mai nike!” ⁴Ale mo vereea isara mara, “Na Sabbath, mo tataholo vara ãa tueni na tamlohi teni vara ãa komo tea? Mo tataholo vara ãa juri te mauri teni ãa vilia?” Pani la ãohu vara la ãaramia. ⁵Iesu mo kilau ãalihira na lolokoru, matan mapura mo ãilangi, ale mo vereea isan tamlohi lima kuti atu mara, “O ãirahi na limam.” Tamlohi atu mo

vaia sohena ale limana atu mo mele řuhu. ⁶Pa la Pharisee atu la malue vahatea, la vano la tovi takonahi na tamlohi la lo usuri supe Herod, ale la aleale malele matan vara la pa vilimatei Iesu hinia.

Tamlohi Matuvana La Usuria

⁷Iesu tolu na nona tamlohi usuri la malue, la sivo na tasin Galilee, ale vao tavera matea mo usuria. La tai Galilee, Judea, ⁸Jerusalem, Idumaea, hai la tai na tavalu wai Jordan, ale na jara řalihi Tyre enia Sidon. Vao tavera atu lara la rongo la hinau atu Iesu mo lo vaira, la mai isana.

⁹Ale hin jara atu Iesu mo vere na nona tamlohi usuri vara la tau mamahuni te boti hatea matana matan vao tavera atu, vara i vono la pa tohoia, ¹⁰matan Iesu mo vai tihai na rojoa nona tamlohi matuvana moiso, mo vai la haratu la rojo la lo vartohoi řalihia vara la tikelia. ¹¹Ale tanume lumiha sasati na tamlohi lara la hitea, la jovi sivo na nahona la ngara lara, “Engko Natun God!” ¹²Pani Iesu mo reti řilangi isara vara la sopo vereulia vara enia hare.

Mo Viřoni Na Nona Tamlohi Usuri

(Mt 10.1-4; Lk 6.12-16)

¹³Moiso, Iesu mo sahe aulu na vutivuti matea, ale mo tovi la haratu mo opoira, ale la mai isana. ¹⁴Ale mo viřoni na tupu sangavulu řomana mo rua sei mo tovira vara la vahařule, matan vara i pa řulera la vano isana tamlohi mata retivujavujangira, ¹⁵ale mo silera na suiha mata titiu nařihi na tanume sasati. ¹⁶Mo viřoni la tupu sangavulu řomana mo rua atu sohen harihi:

Simon sei Iesu mo tau na hijana vara Peter.

¹⁷James enia John natun Zebedee, Iesu mo silera na hija vara Boanerges' řaramina, ‘Natu Piri’ matan jingora mo lo tupali tarea.

¹⁸ Andrew,

Philip,

Bartholomew,

Matthew,

Thomas,

James natun Alphaeus,

Thaddeus,

Simon mara Cana enia tamlohi matea mata valum mata jarana,

¹⁹ ale Judas Iscariot, haratu mo lo turuposi hinia.

Suiha Non Iesu

(Mt 12.22-32; Lk 11.14-23; 12.10)

²⁰Moiso Iesu mo mele vano hin ima atu mo lo toho hinia. Mo sopo tuai vao tavera la mele mai la takonahi, ale la vaia mo sopo te masapa vara

la efi hanhani. ²¹Tavtavuin Iesu lara la rongoa, la vano vara la taurilatia matan la lo veree lara, “Hara sei, romina mo tihai sei!”

²²Ale tamlohi vujangi mata leu sei la tai Jerusalem la lo veree lara, “Tamlohi sei, supe nona tanume sasati sei Beelzebul mo sohonua, ale mo lo titiu narihi na tanume sasati na suihana!”

²³Pani Iesu mo tovira mai isana ale mo veree mara, “Mo sohena sava natu Setan i efi mele levuti narihi Setan? ²⁴Jara tari sei supe la lo asesehira hinira hasera la pa maroi, ale i pa sopo te taon tavera teni te vao ima vara i lo asesehira hasena i pa efi turu. ²⁵Vara vao ima matea i lo levuti na vaona, tamlohi hinia la pa efi toho ruhu sohena sava? ²⁶Ale Setan peresi na vaona vara la lo levlevutira hasera purongo, suihan Setan i pa turu sohena sava matan suihana i pa isoiso. ²⁷Ka hitea? Vara tamlohi matea mo opoia vara i unu na ima tamlohi suiha matea mata i vanaho te nona hinahinau, i pa lavi te asi hatea i pesi tamlohi suiha atu tako, moiso i pa lavi na nona hinahinau.

²⁸Vararuhu, na veree isamim vara hehe tari tamlohi la lo vaira teni na nora retisasati hin God, God i pa romira. ²⁹Pani hare mo lo vere lejileji Tanume Tapu, enia, God i pa sopo efi romia hin te rani.” ³⁰Iesu mo lo verera hin la hinau sei matan la lo veree vara tanume sasati lumihia matea mo lo toho hinia.

Vaon Iesu La Alea

(Mt 12.46-50; Lk 8.19-21)

³¹Tinan Iesu peresi na voraina la pala hin ima atu, la lo turu na jingoima ale la sohai na reti sivo isan Iesu vara i mai i hitera. ³²Vao matea mo lo sakele ralihi Iesu ale la veree isan Iesu lara, “Eh! Tinam peresi na voraim peresi na vevoraim la lo toho na jingoima la lo aleho!”

³³Pani Iesu mo ramira mara, “Tinaku enia hare? Voraiku enira hare?” ³⁴Mo kilau ralihi la haratu la lo sakele ralihia mara, “Ka hitea? Tinaku peresi na voraiku enira nahai! ³⁵Sava tamlohi mo lo vai na masalon God, enia voraiku teni vetasiku teni tinaku.”

Tamlohi Isa Matea

(Mt 13.1-9; Lk 8.4-8)

4 ¹Na rani tinapua matea, Iesu mo lo vujangi na tamlohi na pahisa tasin Galilee. Hin rani atu vao tamlohi la lo mai la lo turu porotia. Ale matana, mo vele na boti matea mo lo sale hin tasi atu, ale mo sakele hinia. Vao tavera atu la lo toho na jarauta na pahisa tasi. ²Iesu mo lo vujangira na titileu matuvana, ale mo lo vujangira mara,

³“Ha tapurongo! Tamlohi hapoŕahi matea mo malue mo vano vara i hapoŕahi na pulana piri wit. ⁴Mo lo hapoŕahira, pani hai la jovi na malele tavera, maji avuavu la mai la hani vevuhira. ⁵Hai la jovi na

vatuvalu, uluara la vila, matan tano mo sopo tavera. ⁶Pani alo mara mo vele, la wit atu la nunu la mate mata warira la sopo sivo atano jea. ⁷Hai la jovi na urata, pani urata atu mo rovira mo punira ale la sopo vua. ⁸Pani hai la jovi na tano řuhu, hin tano řuhu atu la ulua. La ulua la vai na vuara, hai namara mo ngavulu tolu (30), hai mo ngavulu limarave (60), hai mo ngavulu sangavulu (100)!” ⁹Iesu mo mele verea mara, “Haratu mo eri rongovosahia, o tapurongo!”

Mata Sava Mo Vere Na Titileu

(Mt 13.10-17; Lk 8.9-10)

¹⁰Hitahuna, mara mo lo toho enia hasena, tamlohi hai peresi la nona tamlohi usuri tupu sangavulu řomana mo rua atu la usia hin la titileu atu.

¹¹Ale Iesu mo verea isara mara, “God mo majinga hin kamim vara ha levosahi na řaramin mauri atu God mo aulu hinia, pani na lo vere la hinau nike na titileu vara a jarohira isana vinano, ¹²matan vara Retiulia i masese sei mara,

‘La pa hite na sava na lo vaia,
pani la pa sopo eři hitevosahia.

La pa rongo na noku reti,
pani la pa sopo eři rongovosahia.

Matan, vara i vono,

la pa posi mai isaku ale a pa řomira na nora hehe.’ ”

Isa 6.9-10

Řaramin Titileu Atu

(Mt 13.18-23; Lk 8.11-15)

¹³Iesu mo verea isara mara, “Ka sopo rongovosahi titileu akerihi? Vara mo vono, sohena sava natu ha pa eři levosahi vevuhi na titileu tinapua?

¹⁴Tamlohi hapořahi na piri mo hapořahi na reti non God. ¹⁵Ale la haratu la jovi na malele tavera, hin rani atu tamlohi la rongora, Setan mo mai vahatea purongo ale mo lavi nařihi la reti atu sei la lo toho na mapura.

¹⁶La haratu la lo jovi na vatuvalu, enira la haratu sei lara la rongo na reti non God, la lavia vahatea purongo na avulahi. ¹⁷Pani mo sopo te warira ale reti non God mo lo toho mata makomo rani purongo. Ale vara rani řilangi la mai teni tamlohi la turuleji hinira mata reti non God, la jovi nařihi vahatea purongo.

¹⁸Ale la haratu la lo jovi na urata, enira la haratu sei la lo rongo na reti non God, ¹⁹pani řomkaka mata varama peresi na tavgav haluhalu ale masalora mata hinau tinatinapu mo unu hinira mo puni pa reti atu la lo lavia, ale mo sopo eři vua. ²⁰Ale la haratu la lo jovi na tano řuhu, enira la haratu sei la lo rongo na reti non God,

ale la lavia na maurira ale la avulahi hinia. Mo vua mo tikeli mo ngavulu tolu (30), hai mo ngavulu limarave (60), ale hai la tikeli mo ngavulu sangavulu (100).”

Titileu Mata Hinau Sei La Luhū
(Lk 8.16-18)

²¹Iesu mo mele vereā isara mara, “Ka ōm vara mo tataholo vara tea mo hasahi te lamu ale i taua na ruhuruhun te tanga teni te vata pani mo sopo na jara sakele mata lamu?”

²²Hinau tari la lo luhu, la pa pala na jara tavera. Ale mo sopo te hinau luhu hatea vara i pa sopo pala na jara tavera. ²³Vara tea te perona, i lo rongo na noku reti!”

Ha Tapurongo Mamahu

²⁴Iesu mo mele vereā isara mara, “Ha tapurongo na noku retireti i ōruhu matan vara nomim lelevosahi i pa ulua i tavera. ²⁵Haratu mo lo vaihitea vara i levosahi na noku reti, enia i pa eŋi mele levosahia i tavera i maŋivi jea. Pani haratu mo sopo tapurongo i ōruhu, sava mo lo toho isana moiso la pa lavi naŋihia isana.”

Titileu Mata Piri

²⁶Iesu mo mele vereā mara, “Mauri atu God mo aulu hinia mo sohena piri vipahai tamlohi mo hapoŋahira na lepa. ²⁷Vara mo hapoŋahira moiso, i pa sopo eŋi mele vai te hinau hinira. Tamlohi atu mo lo juruvi ale mo lo mele kilau na rani hatehateahi, ale piri atu mo tupali ale mo ulua pani tamlohi atu mo sopo levosahia vara mo pa sohena sohena sava. ²⁸Lepa atu hasena mo vai la piri atu la ulua. Tiroma la juliha, ale lahora la peravu, ale mo sopo tuai la vira, la vua. ²⁹Pani vara vuana la mena, tamlohi atu i pa vura na sita matan nora asitauni natu.”

Titileu Mata Piri Paka
(Mt 13.31-32; Lk 13.18-19)

³⁰Iesu mo mele vereā mara, “A pa tovongi na sava hin mauri atu God mo aulu hinia, teni sava titileu natu i pa tataholo vara a vereulia hinia? ³¹Mo sohena piri paka matea vara la lavoa na lepa, mo rihirihi mo jeu na piri pahai tari. ³²Pani vara mo ulua mo tavera mo jeu na vipahai tinatinapua tari, ale mo sohai na rangarangana tavera matan vara maji avuavu la eŋi vai na taura na malumaluna.”^a

Mo Vujangira Na Titileu Mata Sava
(Mt 13.34-35)

³³Iesu mo lo vujangi na nona reti na titileu matuvana sohen harihi, matan vara la pa rongovosahira usuri na nora lelevosahi. ³⁴Iesu mo lo

^a 4.32 *piri paka*: Iesu mo vere na piri mustard, enia piri matea mo varihi jea.

vujangi na vao tamlohi na titileu purongo, pani hitahu vara mo lo toho hasena peresi na nona tamlohi usuri, mo pa lo vereuli na řaramira isara.

Iesu Mo Horo Na Langi Tavera

(Mt 8.23-27; Lk 8.22-25)

³⁵Iesu mo lo toho hin boti atu, ale alo mara mo pa lo sivo vara i tihai, mo vereia isara mara, “Řa sua roto tasi nike, řa vano na tavaluna.” ³⁶La tinařihi vao atu ale la vano, pani mo sopo enira hasera purongo, boti tinapua hai sohena la lo usurira. ³⁷Mo sopo tuai langi tavera matea mo sere, mo vai na suhusuhu la lo kamekame sivo na lolo boti, ale tungu mo lo mařivi.

³⁸Pani Iesu mo lo juruvi na elunga matea na pulo boti. Ale nona tamlohi la řohaia lara, “Tija! Ko sopo levosahia vara řa pa pute!”

³⁹Iesu mo kilau ale mo reti řilangi isan langi atu, ale mo vereia isan tasi atu mara, “Ha isoiso! Ha toho malum!” Vahatea purongo langi atu mo moti, ale tasi tavera atu mo tamata mo tamata. ⁴⁰Iesu mo vereia isara mara, “Ka matahu tavera sohena mata sava? Mo sopo lo te nomim rasua teni?”

⁴¹Ale matahu tavera mo sohonira ale la lo vereia isara hasera lara, “Avei, sava tamlohi nahai? Mo reti purongo ale langi peresi na tasi la oloolo hinia!”

Mara Gerasenes Matea

(Mt 8.28-34; Lk 8.26-39)

5 ¹Iesu peresi na nona tamlohi la hoso na jara Gerasenes. ²Lara la hoso na jarauta hin jara atu, tamlohi matea tanume lumiha sasati matuvana la lo toho hinia mo malue na taptap, mo sinai mo tapaia. ³Tamlohi nike mo lo toho na taptap, ale tea i sopo eři pesia hin te asi teni te jen. ⁴Hina purongo vara la pesi na limana peresi na palona na jen teni te aen, mo rotorotoro mo kamekamera. Tea i sopo eři vaia i toho malum. ⁵Na rani peresi na vutepongi hatehateahi, mo lo ulo řalihi na taptap peresi na vutivuti atu, ale mo lo tangi mo lo hasena tai na epena na vatu.

⁶Ale mara mo hite Iesu mo pa lo toho asau, mo maro vano isana mo jovi papaohi na nahona. ⁷Ale mo tangi na leo tavera matea mara, “Iesu Natun God Aulu Jea, engko te nom sava isaku? Na usiho na hijan God vara o sopo vailejilejiau!” ⁸Mo pa vereia sohena matan Iesu mo lo vereia isana mara, “Tanume lumiha sasati, o malue isan tamlohi nike nakerihi!”

⁹Iesu mo usia mara, “Eh, engko hijam hare?”

Tanume sasati atu mo řaramia mara, “Hijaku enia Legion, matan kamam kama vao tavera jea!” ¹⁰Tanume sasati atu mo usia řilangi isan Iesu vara i sopo levuti nařihira na jara Gerasenes.

¹¹Ale vao tavera mata poi matea la lo susua na pahisan vuti atu. ¹²Ale tanume sasati atu la usia řilangi isan Iesu lara, “O řule kamam kama

vano isana poi, o tinañihi kamam kama unu hinira.” ¹³ Ale Iesu mo tinañihira. La tanume lumiha sasati atu la malue isan pa tamlohi atu, la vano la unu isan la poi atu, evira korong mo tikeli tari vaha rua (2,000). Ale vao poi atu la solesole usuri pesapesa atu la jovi sivo na tasi ale la pute enira mo isoiso.

¹⁴ Tavuin la poi atu la rovo la sahe la verea na lolon taon tavera atu peresi na jara řalihi ea. Ale tamlohi la maro la mai vara la hitea vara sava natu mo masese atu. ¹⁵ Ale la mai isan Iesu, pani lara la hite pa tamlohi atu sei tanume sasati la lo sohonía mo lo sakele ea ale mo ru na ruru, ale řomina mo mele řuhu moiso, matahu mo sohonira. ¹⁶ Ale la haratu sei la lo hite na sava mo masese la sorahi na sava mo masese isan tamlohi atu sei tanume sasati la lo toho hinia peresi la poi atu. ¹⁷ Ale la tapulo usia řilangi isan Iesu vara i malue na jarara.

¹⁸ Iesu mo pa lo vele na boti, pa tamlohi atu sei tanume sasati la lo sohonía mo usia řilangi isan Iesu vara i pa usuria. ¹⁹ Pani Iesu mo sopo tinañihia pani mo verea isana mara, “O mule, o vano isana tapalam ale o verea na sava Moli God mo vaia matam, ale sohena sava mo řomopoiho mo tavera jea.” ²⁰ Ale pa tamlohi atu mo mele hilu ale mo tapulo vereuli na sava Iesu mo vaia matana hin la taon atu mo sangavulu sei la tovia Decapolis. Ale tamlohi tari la mařurahi tavera hinia.

Venatun Jairus

(Mt 9.18-26; Lk 8.40-56)

²¹ Ale Iesu mara mo mele hilu mo hoso na tavalun tasi atu, vao tamlohi tavera jea matea la mai la turu řalihia na pahisa tasi. ²² Tamlohi tavera matea na ima lotu nona tavgavin Israel hin jara atu hijana Jairus, mo mai mara mo hite Iesu mo papaohi sivo na palona. ²³ Jairus mo usia řilangi isana mara, “Venatuku rihirihi, i sopo tuai i pa mate. O mai o tau na limam hinia matan vara i mele řuhu ale i mauri.”

²⁴ Ale Iesu mo usuria. Ale vao tavera matea la lo usuria la lo tiatia hinira. ²⁵ Ale hařai matea mo lo toho hin vao atu. Ale mo rojo na rojoa nona hařai mata tauni mo sangavulu řomana mo rua moiso. ²⁶ Mo jalahi na mania tavera isana doctor matuvana moiso, ale la doctor atu la sopo eři tuenia, la sopo vaia i řuhu pani mo mele sati jea. ²⁷ Mo rongo na tamlohi la lo sorahi Iesu ale mo mai na hařin Iesu hin vao atu mo tikeli na pingopingo nona ruru. ²⁸ Matan řomina mara, “Vara a eři tikeli purongoi na nona ruru, noku rojoa i pa tihai!” ²⁹ Ale vahatea purongo řae atu sei mo lo maro mo mamasa, ale mo rongovosahia na epena vara nona rojoa mo tihai.

³⁰ Ale Iesu sohena mo rongovosahia vara suiha mo malue hinia, ale mo posi vahatea isan vao atu ale mara, “Hare mo tikeli na noku ruru?”

³¹ Nona tamlohi usuri la verea lara, “Ko pa usia vara hare mo tikeliho sohena sava, ko sopo hitea vara vao nike la lo tiatia isam?”

³² Ale Iesu mo kilau řalihira vara i vileia vara hare natu, mo tikelia.
³³ Pani hařai atu sei mo levosahi na sava mo lo masese isana mo mai isan Iesu na matahu, mo popovitoho na palona ale mo vereia na hinau tari.
³⁴ Iesu mo vereia isana mara, “Venatuku, nom rasua mo vaiho ko mele řuhu. O vano na tamata ale nom rojoa i pa tihai jejeu.”

³⁵ Iesu mo pa lo retireti isana hařai atu, tamlohi hai la tai na iman Jairus la mai la vereia isan Jairus lara, “Venatum mo mate moiso, o sopo mele usi tamlohi vujangi vara i mai.”

³⁶ Pani Iesu mara mo rongo na sava la lo vereia mo vereia isan Jairus mara, “O sopo matahu! O rasuau!” ³⁷ Ale Iesu mo sopo tinařihia vara tea i usuria pani Peter enia James peresi John tasin James. ³⁸ La vano la pala na iman tamlohi tavera mata ima lotu nona Jew atu, ale Iesu mo hite na tamlohi la lo tangtangi, la lo tangi aulu, la lo vai na vavaore tavera. ³⁹ Ale Iesu mara mo unu mo vereia isara mara, “Mata sava ka lo vai na vavaore tavera, ale ka lo tangtangi? Hařarihi nike mo sopo mate, mo juruvi řomaliho purongo.”

⁴⁰ Ale tamlohi la manaluluhi Iesu, pani mo řulera enira mo isoiso la malue. Ale mo lavi taman hařarihi atu peresi tinana peresi na nona tamlohi usuri la unu sivo na jara hařarihi atu mo lo toho ea. ⁴¹ Iesu mo tauri na liman hařarihi atu mo vereia mara, “Talitha kumi!” Ale řaramin reti nike enia ‘Venatuku, o turu!’ ⁴² Ale vahatea purongo hařarihi atu sei taunina mo sangavulu řomana mo rua mo mele turu ale mo tapulo hahau. Ale mařurahi tavera mo sohoni tamana peresi tinana peresi na nona tamlohi usuri. ⁴³ Iesu mo vereia isara mo isoiso vara la sopo mele sorahia isan tea, ale mo vereia isara vara la silea hin te hinau i hania.

Mara Nazareth La Řohu Hin Iesu

(Mt 13.53-58; Lk 4.16-30)

6 ¹ Ale Iesu peresi na nona tamlohi usuri la malue hin jara atu la mai na nona taon, Nazareth. ² Na Sabbath matea Iesu mo tapulo vujangi na ima lotu ea, ale vao tamlohi la rongo na nona vujangi la mařurahi tavera lara, “Tamlohi nike mo pa lavi la hinau nike epu? Ale nona lelevosahi mo pa tai epu? La hinau mařurahi nike la pa pala na limana sohena sava? ³ Mo sopo pa tamlohi voro ima nahai teni, natun Mary ale vorain James, Joses, Judas peresi Simon? Mo sopo vetasina nahai la lo toho peresiřa?” La řongo mo sati matan mo lo vai la hinau sei.

⁴ Pani Iesu mo vereia isara mara, “Tamlohi jara tinapua la pa sile na oloolo isana přovet matea, pani i pa sopo eři lavi te oloolo na jarana tataholo teni na naho tahisana teni na naho voraina.”

⁵ Iesu mo sopo vai te matamata tavera isana tahisana, pani mo tau na limana na tamlohi rojoa tupu visaleta purongo, ale nora rojoa la tihai.

⁶ Iesu mo mařurahi matan la sopo rasua.

Tamlohi Usuri La Malue

(Mt 10.5-15; Lk 9.1-6)

Moiso mo vano na jara tinatinapua mo lo vujangi na tamlohi ea. ⁷Mo tovi la tamlohi atu tupu sangavulu řomana mo rua la mai isana, ale mo řulera la vano mo ruarua, ale mo silera na suiha vara la titiu nařihi na tanume lumiha sasati na tamlohi. ⁸Iesu mo vereea isara vara la sopo lavi te hinau na nora hahau sohena hanhani teni te tanga, teni te mania, pani tihonira purongo. ⁹La pa ru na sabat pani la pa sopo mele lavi te harua rurura tinapua. ¹⁰Iesu mo vereea isara mara, “Sava ima ka lo toho hinia hin te vanua, ha lo toho atu i tikeli rani atu ka mele malue hin vanua atu. ¹¹Pani vara te vanua la řohu hin kamim teni la sopo tapurongo isamim, ha sařsařhi nařihi na tangotango palomim hin jara atu vara i vujangia vara God i pa arira.”

¹²Ale la malue la vano la retivujavujangi na tamlohi vara la posi na hehe. ¹³La titiu nařihi na tanume sasati matuvana, ale la tau na wel na patu tamlohi rojoa matuvana ale nora rojoa la tihai.

John Tamlohi Paptijo Mo Mate

(Mt 14.1-12; Lk 9.7-9)

¹⁴Hin rani atu, supe Herod Antipas mo rongo na sorasora hin Iesu, matan tamlohi tari la lo sorahia. Hai la vereea lara, “John tamlohi paptijo mo mele turu na mateia. Hinau atu natu mo vaia mo suiha vara i eři vai la matamata sei.” ¹⁵Pani hai la vereea lara Iesu enia Elijah, ale hai la vereea lara enia přovet matea matan tuai. ¹⁶Pani Herod mara mo rongoa mo vereea mara, “John tamlohi paptijo! Pani enau natu na tai nařihi na patuna, varařuhu mo mele turu na mateia!”

¹⁷Matan Herod natu sei mo řule na tamlohi vuro vara la taurilati John, ale la pesia na ima řilangi vara i vai Herodias, naroun tasina Philip i avulahi matan Herod mo lavia sohena narouna. ¹⁸Matan John mo lo vereea isan Herod mara, “Usuri na leu mo sopo tataholo vara o lavi naroun tasim sohena naroun.”

¹⁹Ale Herodias mo lo vaihitea vara i vilimatei John, pani i sopo eři vaia hasena. ²⁰Matan Herod mo matahuni John matan mo levosahia vara John enia tamlohi tataholo matea mo tapu ale Herod mo lo matahia. Hina purongo vara John mo lo vaia mo lo řomkaka tavera, enia mo opoia vara i lo tapurongo na retireti non John.

²¹Pani Herodias mo hite na masapa matea na hanhani tavera mata pongi vora non Herod. Herod mo usi na nona tamlohi aulu peresi na nona tamlohi tatavera mata vuro ale la haratu la lo aulu Galilee la mai hinia. ²²Matan venatuna sei hijana Herodias mo unu mo velu ale mo vai Herod peresi la haratu la lo toho atu la avulahi tavera. Ale Herod mo

verea isan venatuna mara, “O usiau hin te hinau ko opoia, ale a pa silea isam.” ²³Ale Herod mo retitauhi mara, “A pa sileho na sava hinau ko usia, hina purongo vara i tikeli na sope jara na lo aulu hinira.”

²⁴Moiso mo malue mo vano isan tinana mo usia mara, “Nana, a pa usi na sava isana?”

Ale tinana mara, “Na opoi na patun John tamlohi paptijo!”

²⁵Ale vahatea purongo mo mele unu mo vereea isan Herod mara, “Na opoia vara o sileau nakerihi na patun John tamlohi paptijo hin te peleti hatea!”

²⁶Herod mo rongo mo sati tavera matana. Pani mo mahanuhanu vara i tope na nona retitauhi sei mo vaia na nahon la haratu la lo toho atu. ²⁷Ale vahatea purongo mo řule na nona tamlohi mata vilimatei na tamlohi matea vara i tai roto na patun John. Tamlohi atu mo vano na ima řilangi ale mo tai roto na patuna, ²⁸moiso, mo lavi na patuna na peleti matea mo silea isan hařai atu. Ale hařai atu mo lavia mo silea isan tinana. ²⁹Tamlohi usuri non John lara la rongoa, la mai la lavi na tarapena, ale la taua na papa vatu matea.

Vao Tavera La Lo Usuri Iesu

(Mt 14.13-21; Lk 9.10-17; Jn 6.1-14)

³⁰Pa la tamlohi usuri atu Iesu mo lo řulera la mele mai ale la vere vevuhi na sava la lo vaira ale la lo vujangira. ³¹Ale Iesu mo vereea isara mara, “Řa malue hin vao nike řa vano hin te jara hasetoho řa mapu makomona tako.” Matan tamlohi mo mařivi la lo mai ale la lo vano ale mo sopo te masapa vara la eři hanhani. ³²Ale la vele na boti matea la vano na jara hasetoho matea enira hasera. ³³Pani vao tavera mata taon matuvana la hitera la lo vano, ale la maro usurira na jarauta, ale la kakau tiroma hin jara atu la pa hoso ea. ³⁴Iesu mara mo hoso mo hite na vao tavera matea, ale mo řomopaira matan la sohena sipsip mo sopo te tavuira. Ale mo tapulo vujangira na hinau matuvana.

³⁵Alo mo sivo moiso, ale nona tamlohi usuri la mai isana lara, “Moli jara hasetoho nahai, ale nake mo pongi moiso. ³⁶O řulera la vano řalihi jara nike ale na vanua vara la voli te hara hinau.”

³⁷Pani Iesu mo řaramira mara, “Kamim purongo ha vahanira!”

Pani lara, “Voli tamlohi mata rani ngavulu sangavulu rua mo sopo lo navu mata i voli te pereti vara i vahani vao tamlohi nike.”

³⁸Iesu mo usira mara, “Ha vano ha hitea vara ka lo lavi na hanhani mo visa.”

La mele mai lara, “Pereti mo lima peresi na maji mo rua.” ³⁹Moiso Iesu mo ratileu vara la sakele na vao na talu řuvu. ⁴⁰Ale la sakele na vao mo tikeli mo ngavulu lima (50) teni mo ngavulu sangavulu (100).

⁴¹Moiso, Iesu mo lavi pa pereti atu mo lima peresi pa la maji atu mo rua mo tařa sahe na tuka mo vere meje isan God matara moiso mo

topera mo silera isana nona tamlohi usuri vara la asera isana vao tamlohi hatehateahi atu. ⁴²Enira mo isoiso la hanhani ale la masu mo řuhu. ⁴³La sohoni na tanga mo sangavulu řomana mo rua na mesin la pereti atu mo lima peresi la maji atu mo rua. ⁴⁴Evi tamlohi purongo sei la lo hani pereti atu mo tikeli mo tari vaha lima (5,000).

Mo Hahau Na Pusa Tasi
(Mt 14.22-33; Jn 6.15-21)

⁴⁵Vahatea purongo atu Iesu mo vere na nona tamlohi usuri vara la vele na boti la vano tiroma na tavalu tasi na vanuan Bethsaida, ale Iesu mo lo řule la vao atu vara la mule. ⁴⁶Moiso, enia mo malue isara mo sahe aulu na vuti vara i usiusi.

⁴⁷Pongi mo mai ale pa boti mo lo toho na livuha tasi moiso, ale Iesu hasena mo lo toho na jarauta. ⁴⁸Ale mo hitera la lo vaihitea řilangi vara la suahia boti atu matan la lo songahi na langi. Na toa tarere mo hahau na pusa tasi mo mai isara. Mo vano sohena vara i jeura, ⁴⁹pani lara la hitea mo lo hahau na pusa tasi, la řomi vara nunua matea, ale la uloulo ⁵⁰matan enira mo isoiso la hitea ale la matahu tavera. Pani vahatea purongo Iesu mo retireti isara mara, "Ha sopo matahu, enau sei!" ⁵¹Ale mo vele sivo na lolo boti peresira, ale vahatea purongo langi atu mo moti. Ale la mařurahi tavera. ⁵²Pani la sopo lo hitevosahia vara Iesu enia hare, hina purongo na matamata sei Iesu mo lo vaia na suihana hin la maji atu peresi la pereti atu matan mapura la řilangi mata la rasua.

Tamlohi Rojoa Matuvana Gennesaret
(Mt 14.34-36)

⁵³Iesu tolu na nona tamlohi lara la vano roto na tasi la pala Gennesaret la sahe la hoso, ⁵⁴ale lara la sevuti hin boti atu, vila řuhu purongo tamlohi hin jara atu la hitevosahi Iesu. ⁵⁵La maro la vano na jara tari řalihi jara atu la lavi na tamlohi rojoa na epara la mai isana na sava jara la rongoa vara mo lo toho ea. ⁵⁶Ale na sava jara Iesu mo pala hinia, hina purongo vara hin te vanua, teni te taon tavera, teni na ima hasetoho, tamlohi la lavi na nora tamlohi rojoa la taura na jara maket, ale la lo usia řilangi isana vara la eři tikeli na pingo nona ruru purongo. Ale tamlohi tari sei la tikelia, nora rojoa la tihai.

Vujangi Mata Mapu Tamlohi
(Mt 15.1-9)

7 ¹Na rani matea Pharisee peresi na tamlohi vujangi mata leu, la tai Jerusalem la mai isan Iesu. ²La mai ale la hitea vara tatua nona tamlohi usuri la lo hanhani pani la sopo hoje na limara tiroma sohena Leu non Moses mo vere. ³Matan Pharisee peresi na Jew tari, la sopo

eři hanhani vara la sopo javulahi na limara tiroma, matan la lo usuri na posposi nona vajiaha matan tuai. ⁴Ale la pa sopo eři hani te hinau la lavia na maket vara la sopo javulahi na limara tiroma. Hinau akerihi enia vonan la leu atu matuvana sei la lo usurira, sohena posposi mata hoje na paniken teni peleti teni jilivi teni pesin. ⁵Ale Pharisee peresi na tamlohi vujangi mata leu la usia isan Iesu lara, “Mata sava nom tamlohi usuri la sopo usuri na posposi nona vajiaha matan tuai, matan la lo hanhani peresi na lumi limara?”

⁶Iesu mo řaramira mara, “Kamim tamlohi tapnetano, Isaiah mo retimangovi varařuhu hin kamim sei hin haratu mo verea mara,

⁷‘La tamlohi nike la lo ooloo hiniau na nora retireti purongo, pani nora řomřomi mo pa lo toho asau hiniau.

Nora lotu enia lotulotu vono purongo,

ale la lo verea lara nora retileu enia retileu non God.’ *Isa 29.13*

⁸Ka lo řomřomi purongo na leu non God, ale ka lo usuri na vujangi nona tamlohi purongo.”

⁹Ale mo verea mara, “Kamim ka řohu na retileu non God matan vara ha pa taurilati na nomim posposi matan tuai. ¹⁰Matan Moses mo ulia na leu mara, ‘O ooloo hin tinam enia tamam!’ ale ‘Vara te tamlohi i retisasati hin tinana teni tamana ha vilimateia!’ *Exo 20.12; Lev 20.9; Deut 5.16*

¹¹Pani kamim ka lo verea vara mo tataholo purongo vara tamlohi la sopo tueni na tamara teni tinara na nora vejuveju, ale ka lo verea kara, ‘Mo vono, a pa taurilati na mania na retitauhi hinia moiso vara a pa silea isan God.’^b ¹²Ale Ka lo horoa vara i sopo eři tueni tamana enia tinana. ¹³Ka lo vai na leu non God mo lo mai hina purongo na nomim posposi matan tuai sei la silea isamim. Ale mele hinau matuvana sohena ka lo vaira.”

Hinau Mo Vai Na Lumiha

(Mt 15.10-20)

¹⁴Ale Iesu mo mele tovi na tamlohi la mele mai isana, ale mo verea mara, “Kamim mo isoiso ha tapurongo i řuhu isaku, ale ha lo levosahi na noku reti. ¹⁵Mo sopo te hinau hatea vara ha hania i sivo na lolomim i eři vai kamim ha lumiha na nahon God. Pani la hinau sasati sei la lo malue na mapumim, enira natu la lo vai kamim ka lumiha na nahon God.”

¹⁶⁻¹⁷Moiso Iesu mo unu na ima matea vara i tinařihi vao tamlohi atu, ale nona tamlohi usuri la usi na řaramin titileu atu isana. ¹⁸Iesu mo verea isara mara, “Kamim sohena, ka sopo rongovosahia? Ka sopo lo hitevosahia vara sava tamlohi la hania i sopo eři vaira la lumiha na nahon God. ¹⁹Hanhani mo sopo sivo na mapumim. Mo sivo na pangemim

b 7.11 *hinau la retitauhi:* vara i mania teni silesilea.

purongo moiso mo mele malue.” Hin retireti akerihi Iesu mo lo vereia vara hanhahi tari la ŋuhu purongo.

²⁰Ale Iesu mo mele vereia mara, “Sava mo lo malue na mapu tamlohi, enia natu i eŋi vai na tamlohi i lumiha na nahon God. ²¹Matan sava mo lo malue na mapu tamlohi enia: ŋomŋomi hehe, posposi viriu, vavanaho, vilimatei na tamlohi, ²²vaivaileu peresi na tinapua mo lahi moiso, hanmarua, lejileji, haluhalu, posposi maji, maŋivi na mereimerei, retifŋen, ŋomaulu, peresi na posposi rongorongono. ²³La hinau sasati nike natu, la lo malue na mapu tamlohi, ale la vaia mo lumiha na nahon God.”

Tanume Sasati Matea

(Mt 15.21-28)

²⁴Iesu mo malue Galilee mo vano na jara matan Tyre enia Sidon. Ale mo unu na ima matea mo sopo opoia vara tea i levosahia, pani mo sopo eŋi luhu. ²⁵Pani mo sopo tuai haŋai matea sei venatuna tanume lumiha sasati matea mo sohonua, mo rongoa ale mo mai isana mo jovi na palona. ²⁶Haŋai atu enia haŋai ŋoŋoha matea mara Syria Phonecia. Ale mo usia ŋilangi vara i titiu naŋihi tanume sasati atu isan venatuna. ²⁷Ale Iesu mo vereia isana mara, “Ha tinaŋihi na natuvarihia la hanhahi tiroma, matan mo sopo tataholo vara a lavi na hara pereti a pulahia isana viriu!”

²⁸Pani pa haŋai mo ŋarami Iesu mara, “Ko varaŋuhu Moli, pani viriu sei la lo toho na ruhuruhi tep la lo hani na utauta hanhahi hana natuvarihia sei la lo jovi sivo na lepa!”

²⁹Moiso Iesu mara, “Nom ŋarami mo ŋuhu jea! O vano, tanume sasati atu mo malue hin venatum moiso!” ³⁰Haŋai atu mo turu mo mule, ale mo hite venatuna mo lo juruvi malum na vatana, ale tanume sasati atu mo malue isana moiso.

Peropero Matea

³¹Iesu mo malue Tyre ale mo hahau vano na taon matan Sidon ale mo sivo na tasin Galilee, hin jara atu sei la lo tovia Decapolis. ³²Ale tamlohi la lavi na tamlohi matea mo mengo ale mo peropero mo mai isana, ale la usia ŋilangi isana vara i tau na limana hinia. ³³Iesu mo lavi tamlohi atu mo vano hasena hin vao atu, mo tau na varangona na lolo perona, moiso mo lito sivo na varangona, ale mo tikeli na memen tamlohi atu na litona. ³⁴Iesu mo taŋa sahe aulu na tuka, ale mo mapsoro mo vereia na leora mara, “Ephphatha!” Ale ŋaramina enia ‘O roi!’ ³⁵Vahatea purongo perona mo roi, ale memena mo retireti mo mera.

³⁶Iesu mo vereia ŋilangi isara vara la sopo sorahi hinau atu isan te tamlohi, pani mara mo vereia mo ŋilangi enira sohena la opoia mo tavera jea vara la vereulia. ³⁷Matan la maŋurahi tavera ale la lo vereia lara,

“Hinau tari mo lo vaira la řuhuřuhu hajavua. Hina purongo vara la peropero mo vaira la rongō, teni vara la mengo mo vaira la retireti.”

Iesu Mo Vahani Na Tamlohi

(Mt 15.32-39)

8 ¹Hin la rani atu, vao tavera matea mo mele toho peresi Iesu, ale mo sopo te hara hinau. Iesu mo tovi na nona tamlohi usuri la mai isana, ale mo vere isara mara, ²“Enau na řomopoi vao nike matan enira la lo toho peresiau mata rani mo tolu moiso, ale mo sopo te hanhani vara la pa hania. ³Vara a řulera la mule marohati, la pa talekoleko na malele matan tatuara la tai asau řove.”

⁴Nona tamlohi usuri lara, “Pani řa pa vahani la tamlohi nike sohena sava hin jara hasetoho nike?”

⁵Iesu mo usia isara mara, “Ka lo lavi na pereti mo visa?” Lara, “Mo limaravrua!”

⁶Ale Iesu mo vere vao atu vara la sakele, moiso mo lavi la pereti atu mo limaravrua mo vere meje isan God matara, mo topera ale mo silera isana nona tamlohi usuri vara la aseasera isan vao atu, ale la vaia sohena. ⁷Ale la vilei na maji vavarihi mo visaletē purongo, ale Iesu mo vere meje matara ale mo vere isana nona tamlohi usuri vara la aseasera isan vao atu.

⁸Tamlohi tari la hanhani vavano la masu. Hitahu nona tamlohi usuri la sohoni na sope hanhani na tanga mo limaravrua. ⁹Evi tamlohi korong mo tikeli tari vaha vati (4,000). Ale lara la hanhani moiso Iesu mo řulera la mule. ¹⁰Hitahu Iesu mo vele na boti matea peresi na nona tamlohi usuri la vano na jara matan Dalmanutha.

Pharisee La Usi Na Matamata

(Mt 16.1-4)

¹¹Pharisee lara la rongōa vara Iesu mo pala atu, la mai vara la usi arearea hin te hinau, la opoia vara i vai te matamata matan na tuka vara i vujangia vara enia hare.

¹²Pani Iesu mara mo rongōa mo mapsoro ale mara, “Kamim ka lo usi na matamata mata sava? Varařuhu na vere isamim vara enau a pa sopo vai te matamata vara kamim pin tamlohi nake ha pa hitea.” ¹³Iesu mo malue isara ale mo vele hin pa boti atu, mo mele vano roto tasi atu.

Hehe Nona Pharisee

(Mt 16.5-12)

¹⁴Pani nona tamlohi usuri la řomaliho vara la lavi te pereti, ale la lo toho peresi na pereti matelete purongo na lolo boti. ¹⁵Ale la pa lo vano roto tasi atu, Iesu mo retiřoãřoãhaira mara, “Ha lo kilau mata isi nona Pharisee peresi Herod!”

¹⁶Nona tamlohi usuri lara la rongoa la ñomi vara mo lo vereea sohena matan la sopo lavi te pereti. ¹⁷Pani Iesu mo levosahi na sava mo lo toho na ñomira, ale mo vereea isara mara, “Mata sava ka lo sorahia vara ka sopo lavi te pereti? Ka sopo lo levosahia? Korong ñomimim la pelati. ¹⁸Matamim la vuso? Teni ka peropero? Ka sopo mele ñomñomi na sava na lo vaira tiroma? ¹⁹Hin rani atu sei na lo ase na pereti mo lima isan la tamlohi atu mo tari vaha lima (5,000), ale tanga sope hanhani mo visa ka pa mele takonahira?”

La ñaramia lara, “Kama sohoni na tanga mo sangavulu ñomana mo rua.” ²⁰Ale mo mele vereea mara, “Hin rani atu na vahani na tamlohi mo tari vaha vati (4,000) na pereti mo limaravrua, ale tanga mo visa ka pa mele takonahira?”

Lara, “Mo limaravrua.”

²¹Iesu mo mele vereea isara mara, “Ka lo levosahi na sava na lo vereea teni mo vono?”

Tamlohi Vuso Matea

²²Iesu peresi na nona tamlohi usuri lara la pala Bethsaida, tamlohi hai la lavi na tamlohi vuso matea la mai isana, ale la usia ñilangi isana vara i tikelia na limana. ²³Ale Iesu mo tauri na liman tamlohi atu mo tiroma hinia la malue hin vanua atu. Ale mara mo litovi na matana, ale mo tau na limana hinia moiso mo usia isana mara, “Ko hite te hinau?”

²⁴Tamlohi atu mo kilakilau ñalihi ale mara, “Na hite na tamlohi, pani la sohena vipahai la lo hahau ñalihi.”

²⁵Ale Iesu mo mele tau na limana na matana, moiso tamlohi atu mara mo mele roi na matana mo eñi hite na hinau tari la memera. ²⁶Iesu mo vereea isana mara, “O mule, pani o sopo hahau na vanua.”

Iesu Enia Kñisto

(Mt 16.13-20; Lk 9.18-21)

²⁷Iesu peresi na nona tamlohi usuri la malue Galilee ale la sahe na vanua sei la lo toho na jara matan Caesarea Philippi. La pa lo hahau Iesu mo usi na nona tamlohi usuri mara, “Ka rongoa na tamlohi la lo vereea vara enau hare?”

²⁸La ñaramia lara, “Tamlohi hai la vereea vara engko John tamlohi paptijo, hai la vereea vara engko Elijah. Hai la lo vereea vara engko pñovet matea.”

²⁹Moiso Iesu mo pete usia isara mara, “Pani kamim, ka lo vereea kara enau hare?”

Peter mo ñaramia mara, “Engko natu pa Kñisto atu!” ³⁰Ale Iesu mo vereea ñilangi isara vara la sopo mele vereea isan tea vara enia hare.

Mo Retireti Na Nona Mateia

(Mt 16.21-28; Lk 9.22-27)

³¹Iesu mo tapulo vereea isara mara Natun Tamlohi i pa lavi na rani ñilangi na hinau matuvana. Ale tamlohi aulu matan Israel peresi na

p̄ris aulu, peresi na tamlohi vujangi mata leu la pa řohu hinia, ale la pa vilimateia, pani i pa mele turu na hatolu rani. ³²Mara mo lo vere la hinau atu sohena, Peter mo lavi Iesu mo vano hasena, ale mo reti řilangi isana vara i sopo retireti sohen haratu.

³³Pani Iesu mo posi mo kilau vano isana nona tamlohi usuri, mo reti řilangi isan Peter mo verea mara, “O rovo isaku Setan. Řomřomi atu mo tai isana tamlohi, mo sopo tai isan God.”

³⁴Ale Iesu mo tovi la vao atu peresi na nona tamlohi usuri vara la mai isana, ale mo verea mara, “Vara te vonamim hatea mo opoia vara i usuriau, o vaihitea vara o řomaliho na masalom moiso o soloti na nom talopeilopei ale o usuriau! ³⁵Matan sava tamlohi vara mo opoia vara juri na maurina, i pa vaitihaia, pani hare vara mo vaitihai na maurina matakau peresi na Retiřuhu i pa juri na maurina. ³⁶Sava hinau mo řuhu hinia vara o lavi na hinau tari matan varama nike, pani o pa vaitihai na maurim? ³⁷Sava hinau natu, o pa eři vaia vara o eři volituhu na maurim hinia?”

³⁸Matan sava tamlohi vara mo mahanuhanu hiniau peresi na noku retireti hin pina vaivaileu nike sei mo lejileji, enia sohena Natun Tamlohi i pa sopo avulahi hinia hin rani atu i pa mai peresi na nona angelo tapu peresi na mera tavera non Tamana.”

9 ¹Iesu mo mele verea isara mara, “Varařuhu na verea isamim vara tatuamim sei la lo turu nakerihi, la pa sopo lo mate la pa hite mauri atu God mo aulu hinia i mai na suihana tavera.”

Epen Iesu Mo Posi

(Mt 17.14-21; Lk 9.28-36)

²Rani mo limarave la vano moiso, ale Iesu mo lavi Peter, James peresi John, la sahe aulu na vutivuti enira hasera. Hin rani atu la hite na epen Iesu mo posi, ³ale la hite na nona ruru la mera hajavua, la lulu tinapua, la jeu na hinau lulu tari nike na varama. ⁴Moiso la hite p̄rovet Elijah enia Moses la pala ale la lo sorasora peresi Iesu. ⁵Peter mo verea isan Iesu mara, “Moli, mo řuhu matan kama lo toho akerihi. Mo řuhu řa vai te tent i tolu akerihi, matea nom, matea non Moses ale matea non p̄rovet Elijah.” ⁶Matan Peter mo sopo levosahia vara i pa vere na sava matan la matahu hajavua.

⁷Ale telangi matea mo mai mo hohovira, moiso la rongu na leo matea mo malue hinia mara, “Harihi enia Natuku sei na opoia mo tavera jea. Ha tapurongo isana!” ⁸Vahatea purongo la pa ale Moses enia Elijah pani la tihai, pani la hite Iesu hasena mo pa lo toho atu. ⁹Ale lara la lo sevuti na vutivuti, Iesu mo reti horora vara la sopo mele verea na sava la hitea isan te tamlohi vavano Natun Tamlohi i mele mauri na mateia. ¹⁰Ale la sopo mele verea isan tea, pani la lo usia vara řaramin reti sei vara i pa mele turu na mateia enia sava.

Elijah I Pa Mele Mai

¹¹Ale la usia isana lara, “Mata sava natu, tamlohi vujangi mata leu la veree lara, ‘Elijah i pa mai tiroma?’ ”

¹²Iesu mo řaramira mara, “Varařuhu, Elijah i pa mai tiroma vara i vai tataholoi na hinau tari. Pani mata sava natu la ulia na Retiulia vara Natun Tamlohi i pa lavi na řilangi ale la pa vailejleja na nora hiteřeřesi?”
¹³Pani na veree isamim vara Elijah mo pete mai moiso, ale tamlohi la vailejleja usuri na masalora sohena Retitapu mo lo veree.”

Iesu Mo Tueni Na Uluvou Matea

(Mt 17.14-20; Lk 9.37-43a)

¹⁴Iesu peresi la tupu tolu atu, lara la mele sevuti sivo na pulon vuti atu, la hite na tapalara tamlohi usuri peresi na vao tavera matea la lo turu řalihira, ale la hite na tamlohi vujangi mata leu hai la lo vasvasi peresira.
¹⁵Ale la vao tamlohi atu lara la hite Iesu la hutura hinia, ale vahatea la avulahi la maro vano isana.

¹⁶Iesu mo usi na nona tamlohi mara, “Eh! Kamim ka lo vauriuri na sava?”

¹⁷Vonara matea mo veree isan Iesu mara, “Tija, na lavi natuku na mai isam matan tanume mata mengo mo lo toho isana. ¹⁸Vara mo vaia, mo lo pulahia atano na lepa, ale epena la lo řira mo lo hatihati na huřuna moiso jingona mo lo valval. Ale na usia isana nom tamlohi usuri vara la titiu nařihi tanume sasati nike, pani la sopo eři vaia.”

¹⁹Iesu mo řaramira mara, “Kamim nomim rasua mo sohena sava! A pa toho peresi kamim i tikeli pangisa? A pa tueni kamim i tikeli pangisa? Ha lavi uluvou atu i mai isaku!”

²⁰Moiso la lavi uluvou atu mo mai isana, ale tanume sasati atu mara mo hite Iesu, mo tuatuahi pa uluvou atu mo jovi atano na lepa, ale mo lo makurekure, moiso valval jingona mo lo malue.

²¹Iesu mo usia isan tamana mara, “Tanume sasati nike mo tapulo vaia nangisa?”

Ale tamana mo řaramia mara, “Na rani mo lo natirihi. ²²Hin te rani mo vaia mo jovi na hapu teni na wai vara i vilimateia. Pani vara o eři vai te hinau, o řomopoi kamam, o tueni kamam.”

²³Iesu mara, “Ko veree vara a eři vaia! Vara te nom rasua o eři vai na hinau tari!”

²⁴Vahatea tamana mo řaramia mara, “Na rasua, pani o nařihi na noku řomkaka!”

²⁵Ale Iesu mara mo hite na vao matea la lo maro la mai vara la pa turu porotia matana, mo reti řilangi isan tanume lumiha sasati atu mara, “Tanume mengo, na veree isam vara o malue isan uluvou sei nakerihi!”

O sopo mele unu hinia hin te rani!”²⁶ Tanume sasati atu mo ulo sasati, mo mele tuatuhia mo jovi sivo atano moiso mo malue hinia. Tamlohi la hitea sohena vara uluvou atu mo mate moiso, ale lara, “Eh, mo mate!”²⁷ Pani Iesu mo sau, ale mo mele turu.

²⁸ Ale hitahu Iesu mara mo mele unu hin ima atu, nona tamlohi usuri la usia lara, “Mata sava natu, kamam kama sopo eñi titiu nañihi tanume sasati atu?”

²⁹ Ale Iesu mo vere a isara mara, “Tanume sasati sohen haratu, usiusi purongo i eñi titiu nañihia.”

Iesu Mara I Pa Mate
(*Mt 17.22-23; Lk 9.43b-45*)

³⁰ Iesu peresi na nona tamlohi la malue hin jara atu, ale la hahau roto na jara Galilee, matan hin rani atu Iesu mo sopo opoia vara tea i levosahia vara mo lo toho atu. ³¹ Matan mo opoia vara i vujangi na nona tamlohi usuri hasera. Mo mele vere a isara mara, “Tamlohi la pa turuposi hin Natun Tamlohi, ale la pa taua na lima tamlohi vara la vilimateia. Pani na hatolu rani i pa mele turu na mateia.” ³² Pani la sopo rongovosahi na sava hinou mo lo vere a isara, ale la matahu vara la usi na ñarami nona retireti.

Hare Mo Aulu
(*Mt 18.1-5; Lk 9.46-48*)

³³ Lara la kakau Capernaum, ale la unu na ima matea mata la pa toho hinia. Iesu mo usia isara mara, “Sava natu, ka lo sorahia na malele?”³⁴ Pani la sopo ñaramia matan la lo vauriuri vara hare natu mo aulu jea hinira. ³⁵ Ale Iesu mo sakele mo tovi la tupu sangavulu ñomana mo rua atu la mai isana mara, “Vara tea mo opoia vara i aulu i jeu na tinapua, enia i pa hasena taua atano i jeu na volitusi nona tamlohi tari.”

³⁶ Moiso Iesu mo lavi na natirihia matea hin vao atu ale mo taua na livuhara. Moiso mo tulia mara, ³⁷ “Vara tea mo lavi te natirihia sohen haranike na hijaku, enia mo lo laviau. Ale vara tea mo laviau, mo sopo laviau haseku, pani mo lo lavi Tamaku sei mo lo ñuleau sohena.”

Vavahinau Na Hijan Iesu
(*Lk 9.49-50*)

³⁸ John mo vere a isan Iesu mara, “Tija, kama hite na tamlohi matea mo lo titiu nañihi na tanume sasati na hijam, pani kama horoa vara i isoiso matan enia mo sopo tatuaña.” ³⁹ Pani Iesu mo vere a isara mara, “Ha sopo horoa, matan i pa sopo te tamlohi hatea vara mo lo vai na matamata tavera na hijaku i eñi mele verelejelejiu hin te rani. ⁴⁰ Matan la haratu la sopo turuleji hiniña, enira noña. ⁴¹ Varañuhu na vere a isamim, vara tea

mo sile te paniken wai hamañiñi isamim matan ka tamlohi non Křisto, varañuhu enia i pa lavi na otori matana!”

Ha Lo Kilau Mata Posposi Hehe

(Mt 18.6-9; Lk 17.1-2)

⁴²“Pani vara tea mo vai na natirihia matea sohen harihi sei mo rasuau i jovi na hehe, i pa mele řuhu jea vara la lasi te vatu tavera na řalona, ale la putehia na tasi puaha. ⁴³Vara limam mo lo vaiho ko lo vai na hehe, o tai nañihia! I pa mele řuhu jea vara o lavi mauri atu na tuka peresi te limam hatelete purongo, mo jeu haratu vara o pa vano na hapu mata moruhapu sei mo sopo eñi mate peresi na limam mo rua! ⁴⁴⁻⁴⁵Vara palom mo lo vaiho ko lo vai na hehe, o tai nañihia! I pa mele řuhu jea vara o unu hin mauri atu na tuka peresi te palom hatelete purongo, mo jeu haratu vara la pulahiho peresi na palom mo rua na moruhapu. ⁴⁶⁻⁴⁷Vara matam mo lo vaiho ko lo vai na hehe, o hoti nañihia! Mo mele řuhu jea vara o unu hin mauri atu God mo aulu hinia peresi te matam hatelete purongo, mo jeu haratu vara la pulahiho peresi na matam mo rua na moruhapu. ⁴⁸‘Hin jara atu hulesira la sopo eñi mate, ale hapu mo sopo mate hin te rani.’ *Isa 66.24*

⁴⁹Matan God i pa tau na hapu mata rani řilangi na mauri tamlohi tari, matan vara i hani nañihia na hehe na maurira sohena solo mo lo vai na mit mo sopo ranga. ⁵⁰Solo mo řuhu, pani vara mejina mo tihai, ha pa eñi vaia i mele meji sohena sava? Ha taurilati na řomimim mata řohu na hehe, ale ha toho na tamata peresi kamim hatehateahi!”

Vujangi Mata Lahi

(Mt 19.1-12; Lk 16.18)

10 ¹Ale Iesu mo malue Capernaum, mo sivo na jara matan Judea, ale mo vano na tavalu wai Jordan na jara Opae hinia. Hin jara atu vao tamlohi la mele mai isana sohen tarea, ale mo lo vujangira sohen tarea.

²Pharisee hai la mai isana la vaihitea hin retusia akerihi lara, “Tamlohi i pa tope na leu vara mo řohu hin narouna teni mo vono?”

³Iesu mo řaramira mara, “Leu non Moses mo vereva vara sava?”

⁴La tamlohi atu la vereva lara, “Moses mo majinga hinia mara i pa uli na certificate matea matana, moiso i pa eñi řule nañihia i vano.”

Deut 24.1-4; Mt 5.31

⁵Pani Iesu mo řaramira mara, “Moses mo pa uli leu atu matan patumim mo řilangi. ⁶Pani na pongi tiroma sei God mo vai na varama, ‘Mo vai na lamane peresi na hañai.’ *Gen 1.27; 5.2*

⁷Mata hinia atu natu, tamlohi matea i pa sořotahi isan narouna, i pa malue isan tamana enia tinana. ⁸La tupra rua atu la pa mai epe matelete

purongo.’ Matan la sopo mele mo rua, pani la pa matea, *Gen 2.24* ⁹i pa sopo te tamlohi hatea i efi mele tauhasehira matan God mo soʻotahira la mai matea moiso.’ ” ¹⁰Ale hitahuna, Iesu mara mo lo toho hasena na ima peresi na nona tamlohi usuri, ale la mele usia hin pa vujangi atu. ¹¹Ale Iesu mo vereia isara mara, “Vara te tamlohi mo ōhu hin narouna, moiso mo mele lavi na haʻai tinapua, enia mo lo vaivaileu peresi haʻai atu. ¹²Ale vara te haʻai mo ōhu hin tuana, moiso mo mele lahi isana tamlohi tinapua, enia mo lo vaivaileu peresi tamlohi atu.”

Iesu Mo Leʻuhu Na Natuvarihī

(Mt 19.13-15; Lk 18.15-17)

¹³Na rani tinapua, tamlohi hai la lavi na natura la mai isan Iesu matan vara i tau na limana hinira, ale i leʻuhu hinira, pani nona tamlohi usuri la lo horora. ¹⁴Pani Iesu mara mo hitea mo lolokoru hinira, ale mo vereia isara mara, “Ha tinaʻihī na natuvarihī la mai isaku, ha sopo horora matan mauri atu God mo aulu hinia, enia non la haratu sei la sohera. ¹⁵Varaʻuhu na vereia isamim vara te tamlohi mo sopo efi lavi mauri atu God mo aulu hinia sohen natirihī nike, enia i pa sopo efi unu hin mauri atu hin te rani.” ¹⁶Moiso Iesu mo tuli na natuvarihī na limana, ale mo tau na limana aulu na patura mo leʻuhu hinira.

Tamlohi Tavitav Matea

(Mt 19.16-30; Lk 18.18-30)

¹⁷Na rani matea, Iesu mo pa tapulo vara i mele vano na nona hahau matea na jara tinapua matea, uluvou matea mo maro mo mai ale mo papaohi isan Iesu mo usia mara, “Tija ōhuhūhū, a pa vai na sava natu vara a lavi na mauri tui hinia?”

¹⁸Iesu mo vereia mara, “Mata sava ko vereau vara na ōhu? God hasena mo ōhu. ¹⁹Engko ko levosahi na leu, ‘O sopo vilimateia na tamlohi, o sopo vaivaileu peresi na tinapua mo lahi moiso, o sopo vavanaho, o sopo halu, o sopo retihalu hin tahisam, o sopo vai te halu mata vavanaho, moiso o ololo hin tamam enia tinam.’ ” *Exo 20.12-16; Deut 5.16-20*

²⁰Uluvou atu mo vereia mara, “Tija, la leu tari atu na lo usurira na pa lo natirihī mo sinai mo kakau nake.”

²¹Iesu mo kilau tataholo isan tamlohi atu na opoia, ale mo vereia isana mara, “Ko pa lo vejuveju na hinau matea. O vano o haʻehi vevuhi na nom hinau tari, ale o sile na maniana isana tilavono, ale o pa lavi na tavitav na tuka. Moiso, o pa mai, o usuriau!” ²²Pa tamlohi atu ōmina mo jovi mata sava Iesu mo vereia isana, matan enia tamlohi tavitav matea.

Vujangi Mata Suihan God

²³Iesu mo kilau ōalihī, ale mo vereia isana nona tamlohi usuri mara, “I pa ōilangi isan la haratu la tavitav vara la unu hin mauri atu God mo aulu hinia.”

²⁴Nona tamlohi usuri la mañurahi na nona reti matan la lo ñomñomia lara God mo leñuhu na tamlohi tavgav. Iesu mo mele vereea isara mara, “Natuvarihhi, mo ñilangi jea vara tea i eñi unu hin mauri atu God mo aulu hinia! ²⁵Mo mele malum jea vara camel i unu na koko niteli matea mo jeu haratu vara tamlohi tavgav matea i eñi unu hin mauri atu God mo aulu hinia.”

²⁶Nona tamlohi la mañurahi tavera hinia, ale la lo usiusira hinia lara, “Hare natu, i pa eñi juri?”

²⁷Iesu mo kilau tataholo isara mara, “Hinau tamlohi la sopo eñi vaia, God i eñi vaia. Matan God i eñi vai na hinau tari.”

²⁸Moiso Peter mo tapulo vereea isan Iesu mara, “Kama tinañihhi na hinau tari vara kama usuriho!”

²⁹Ale Iesu mara, “Varañuhu, na vereea isamim, vara tea mo tinañihhi na imana, teni tasina teni vetasina, teni tamama teni tinana teni te natuna, teni jarana, ale mo tinañihira matakua teni mata Retiñuhu, ³⁰enia i pa mele lavia nike nake na varama i vaha ngavulu sangavulu (100) na imana, na voraina peresi na vetasina, tinana, peresi na natuna teni jarana, ale i pa lavi na rani ñilangi na lima tamlohi, pani na pongi hitahu i pa lavi na mauri tui. ³¹Pani la haratu sei la lo ñomñomia vara enira la aulu na tamlohi nake, la pa atano jea, ale la haratu sei la lo atano nake, la pa aulu hinira.”

Iesu Mo Mele Vereea Vara I Pa Mate

(Mt 20.17-19; Lk 18.31-34)

³²Ale lara la lo vano na malele vara la sahe Jerusalem, Iesu mo lo vano tiroma, ale la haratu na hañina la mañurahi na nona reti, ale la tupu sangavulu ñomana mo rua atu la matahu matan Iesu mo mele tapulo vere na sava i pa masese isana Jerusalem. ³³Mo vereea isara mara, “Ka hitea, ña lo sahe Jerusalem nahai, pani i pa sopo tuai la pa tau Natun Tamlohi na lima moli mata pñis peresi na tamlohi vujangi mata leu, ale la pa silea na talai vara i mate, moiso la pa taua na lima mara Rome. ³⁴La pa retikerekerehia, la pa litovia, la pa rupia na asi maja, ale la pa vilimateia. Pani na hatolu rani i pa mele turu na mateia.”

Vujangi Mata Volitusi

(Mt 20.20-28)

³⁵Ale James enia John natun Zebedee, la mai isan Iesu la vereea isana lara, “Tija, kama opoi na hinau matea vara o pa vaia matamam.” ³⁶Iesu mara, “Ka opoia vara a vai na sava matamim?”

³⁷La vereea lara, “Kamam kama opoia vara kama pa sakele na pahisam na nom rani suiha. Matea na matuam, ale matea na maraum.”

³⁸Ale Iesu vereea isara mara, “Ka sopo levosahi na sava hinau ka lo usia. Kamim ha eñi inu hin paniken atu mata rani ñilangi sei a pa inu hinia? Kamim ha eñi lavi paptijo atu mata rongohaji sei a pa lavia?”

³⁹La řaramia lara, “Kama eři vaia.”

Ale Iesu mo vereea isara mara, “Ha pa inu hin paniken atu sei a pa inu hinia, ale ha pa lavi paptijo atu sei a pa lavia, ⁴⁰pani mo sopo noku hinau vara a pa vereea vara hare natu i pa sakele na matuaku teni na marauku. God Tama mo tatamahuni la jara atu moiso matan la haratu sei mo viřonira moiso.”

Haratu Mo Aulu Varařuhu

⁴¹La tupu sangavulu tinapua atu lara la rongo hinau atu la lolokoru hin James enia John. ⁴²Ale matana, Iesu mo tovi matavuhira mai isana mo vereea isara mara, “Ka levosahia vara la haratu la lo aulu na tamlohi řořoha la lo řomřomira hasera purongo, ale la lo vailehilehi na tamlohi la lo toho na ruhuruhura. ⁴³Pani i pa sopo sohen haratu isamim. Vara te vonamim mo opoia vara i aulu hin kamim, enia i pa mai sohena nomim volitusi. ⁴⁴Ale vara tea mo opoia vara i tiroma, enia i pa mai sohena slev nona tamlohi tari. ⁴⁵Matan hina purongo vara enau na Natun Tamlohi, na sopo mai vara tamlohi la volitusi isaku. Pani na mai vara a volitusi, ale vara a hase sile na mauriku vara i volituhu na tamlohi matuvana.”

Iesu Mo Tueni Bartimaeus

(Mt 20.29-34; Lk 18.35-43)

⁴⁶La kakau Jericho, ale hitahu Iesu mara mo pa lo malue Jericho tolu na nona tamlohi usuri peresi na vao tavera matea, tamlohi matavuso matea hijana Bartimaeus natun Timaeus, mo lo sakele na pahisa malele, ale mo lo usi na mania isana tamlohi. ⁴⁷Ale mara mo rongoa vara Iesu mara Nazareth mo lo hahau hin jara atu, mo tapulo tangi aulu mara, “Iesu, natun Supe David, o řomopoiau!”

⁴⁸Pani tamlohi matuvana la merusahia lara i toho malum, pani mo mele ulo aulu jea mara, “Natun Supe David, o řomopoiau!”

⁴⁹Iesu mara mo rongoa mo turu atu, mo vereea isara mara, “Ha vereea i mai isaku!”

Ale tamlohi la tovi matavuso atu lara, “Eh, řomim i sopo sati! O turu! Iesu mo toviho.” ⁵⁰Mo pulahi nařihi na nona ruru hamariri, mo vai vilavila mo mai isan Iesu.

⁵¹Iesu mo usia mara, “Ko opoi na sava vara a vaia isam?”

Matavuso atu mo řarami Iesu mara, “Tija, na opoia vara a eři kilau.”

⁵²Ale Iesu mara, “O vano! Nom rasua mo vaiho ko řuhu moiso.”

Ale vahatea purongo matana la kilau, moiso mo usuri Iesu na malele.

Iesu Mo Unu Jerusalem

(Mt 21.1-11; Lk 19.28-40; Jn 12.12-19)

11 ¹Iesu tolu na nona tamlohi usuri la lo usuri na malele mo sahe Jerusalem, ale la mai na vanua matan Bethphage peresi

Bethany na pahisa vutivuti sei la tovia Vuti talu Olive. Iesu mo řule na nona tamlohi usuri mo rua vara la vano tiroma hinira. ²Mo vereea mara, “Ha vano hin vanua aturihi ale ha unu hinia, ale ha pa hite na natu donki matea la lihoa. Tea mo sopo lo sakele hinia hin te rani. Ha uli na asina, ale ha lavia i mai isaku. ³Vara tea mo usi kamim vara, ‘Ka lo vai na sava?’ ha vereea vara, ‘Moli mo opoia, ale i pa mele sohaia i mai nohorih.’”

⁴La vano hin vanua atu, moiso la hite natu donki atu mo lo toho na pahisa malele la lihoa na jingoima ima matea, ale la uli na asina. ⁵Pani tamlohi hai sei la lo turu atu la usira lara, “Mata sava ka lo uli na asin natu donki sei?” ⁶La řaramira sohen Iesu mo vereea isara moiso, ale la tamlohi atu la tinařihia vara la lavi natu donki atu i vano. ⁷La lavia mo mai, la vuřangi na nora ruru aulu na hařin natu donki atu, ale Iesu mo sahe mo sakele hinia.

⁸Tamlohi matuvana la vuřangi na nora ruru na malele, ale hai la lo tai na rau pahai na pahisa malele la vuřangira na malele vara natu donki atu i pa hahau hinia. ⁹Tamlohi hai la lo hahau tiroma, hai la lo hitahu, ale Iesu mo lo toho na livuhara, ale la lo uloulo tavera lara,

“Hasohaso God!”

Psa 118.25

Ale “Leřuhu isan haratu sei mo lo mai na hijan Moli God”. *Psa 118.26*

¹⁰“Avulahi tavera mo lo mai

mata rani suiha non tamařa Supe David mo pala.”

“Hasohaso God aulu na tuka sei mo aulu jea!”

¹¹Iesu mo unu Jerusalem, ale mo unu na rope Temple. Ale mara mo vano řalih'i mo hite na hinau tari moiso, ale matan pongi mo mai mariviti moiso mo malue mo vano Bethany peresi la nona tamlohi atu mo sangavulu řomana mo rua.

Mo Lesati Na Vipahai Fig Matea

(Mt 21.18-19)

¹²Na harua rani na řalavuhu, la malue Bethany ale la lo vano, Iesu mo marohati. ¹³Mo hite na vipahai fig matea mo lo turu asau na pahisa malele, ale mo hahau mo vano hinia vara i hitea vara te vuana, pani mo sopo te vuana, mo lo rauha purongo matan mo sopo lo taro mata i vua.

¹⁴Iesu mo reti isan vipahai atu mara, “I pa sopo mele tea i eři mele hani te vuam hin te rani.” Ale nona tamlohi usuri la rongo reti atu mo lo vereea isana.

Iesu Mo Levutira Na Temple

(Mt 21.12-17; Lk 19.45-48; Jn 2.13-22)

¹⁵La vano la mele tikeli Jerusalem moiso Iesu mo unu na rope Temple, mo tapulo levuti la haratu sei la lo hařehi na hinahinau peresi la haratu

sei la lo voli na nora hinahinau. Iesu mo tarasahi na tep non la haratu la lo jeni na mania nona tamlohi sei la mai Jerusalem. Mo vano mo tohoi roiroi na palapala non la haratu la lo haʻehi na vomae. ¹⁶Mo horo la haratu sei la opoia vara la lavi na nora hinahinau mata haʻehira na lolo ropen Temple atu. ¹⁷Ale Iesu mo vujangira mo vereea isara mara, “Ka sopo lo levosahi na sava la ulia na Retiulia sei mo vereea vara,

‘Imaku enia ima mata ususi nona tamlohi tari na varama.’ *Isa 56.7*
Pani nake ka vaia mo mai sohena,

‘Papa tamlohi vili tamlohi mata mania matea.’” *Jer 7.11*

¹⁸Pʻris aulu peresi na tamlohi vujangi mata leu lara la rongo na sava Iesu mo vaira na Temple, la tapulo aleale malele vara la vilimateia hinia. Pani la matahuni Iesu matan tamlohi tari la lo maʻurahi tavera na nona vujangi. ¹⁹Na ravravi Iesu enia tolu na nona tamlohi usuri la mele malue Jerusalem.

Pa Vipahai Fig Atu Mo Koru

(Mt 21.20-22)

²⁰Na ʻalavuho tinapua, lara la mele vano maʻiviti hin pa vipahai fig atu, la hite na rauna la menumenu, ale lahona peresi na warina la koru moiso. ²¹Peter mo mele ʻomʻomi pa reti atu non Iesu sei mo vereea isan vipahai atu, ale mara, “Tija, o to kilau vano! Pa fig atu ko lo lesati hinia mo koru moiso.”

²²Moiso Iesu mo ʻaramia mara, “Ha tau na nomim rasua hin God!
²³Varaʻuhu na vereea isamim, vara tea nona rasua mo ʻilangi, ale mo sopo ʻomkaka hinia, i eʻi vereea isan vuti tavera akerihi vara, ‘O hase taheho o sahe aulu, ale o pulahiho sivo na tasi tavera!’ ale i pa ololo hinia! ²⁴Ha tapurongo isaku! Na vereea vara sava hinau ka usia na nomim ususi, vara ka rasua mo ʻilangi i pa sohena. ²⁵⁻²⁶Pani vara ka lo ususi, ha ʻomi na hehe nona tinapua sei la vaia isamim, ha ʻomira tiroma, matan vara Tamamim na tuka sohena i eʻi ʻomi na nomim hehe.”

Tamlohi Tavera La Mai Isan Iesu

(Mt 21.23-27; Lk 20.1-8)

²⁷Iesu peresi na nona tamlohi usuri la mele unu Jerusalem, ale lara la lo hahau na lolo rope Temple, pʻris aulu tolu na tamlohi vujangi mata leu peresi na tamlohi aulu tinapua hai la mai isana, moiso la reti isana lara, ²⁸“Sava suiha natu ko lo vai la hinau nike hinia teni hare mo sileho na suiha matana?”

²⁹Iesu mo vereea isara mara, “A pa usi kamim na retusia matea, ale vara ha ʻaramiaiu, enau a pa vere kamim hinia vara na lavi na suiha isan hare natu na lo vai la hinau nike hinia. ³⁰Ha to vereau hinia, paptijo non John mo tai isan God teni isana tamlohi?”

³¹Ale la lo hasera sorasorahia lara, “Vara řa vereea vara enia mo tai isan God, i pa usiřa vara, ‘Mata sava natu, ka sopo rasu John?’ ³²Pani vara řa vereea vara enia mo tai isana tamlohi, la vao nike la pa lo lolokoru hiniřa.” La lo vereea matan la matahu vara la pa vai la vao tamlohi atu la lolokoru ale la sopo eři mele vaira la toho malum, matan la vao atu la rasua vara John enia přovet varařuhu matea. ³³Matan haratu, la tamlohi tatavera atu la řarami Iesu lara, “Kama sopo levosahia.”

Ale Iesu mo vereea isara mara, “Enau sohena, a pa sopo vere kamim hinia vara sava suiha natu, na lo vavahinau hinia.”

Vujangi Mata Tamlohi Sasati

(Mt 21.33-46; Lk 20.9-19)

12 ¹Ale na lolo rope Temple Iesu mo tapulo vujangi na titileu isara mara, “Tamlohi tavera matea mo lavo na isa mata grape matea. Mo vai na ropena, mo voro na jara mata lavi nařihi na waena hinia. Mo voro na ima aulu matea mata kilau na isana. Ale mo sile isana atu vara tamlohi lalavo tinapua la pakaia, ale la lalavo hinia. Moiso pa tamlohi tavera atu mo vano na jara tinapua mata i tohoa ea. *Isa 5.1-2*

²Taro mata vua grape la mena, ale pa tamlohi tavera atu mo řule na nona volitusi matea mo vano vara i lavi na řungana vuara. ³Pani pa la tamlohi atu la tauri pa volitusi, la hamajia, moiso la řulea mo vano lekoleko.

⁴Tamlohi tavera atu mo mele řule na volitusi tinapua matea. Mo vano, pani la hamajia na patuna, ale la vaimahanuhanu hinia. ⁵Tamlohi tavera atu mo mele řule na volitusi tinapua matea. Pani la vilimateia. Tamlohi tavera atu mo mele řule te nona volitusi tinapua matuvana, pani hai la hamajira, ale hai la vilimateira vavano, ⁶tamlohi tavera atu mo hitea vara natuna tataholo purongo mo pa lo toho. Enia mo opoia mo tavera jea, ale mo řomřomia mara, ‘Na levosahia vara a řule natuku i sivo, la pa oloolo hinia.’

⁷Pani pa la tamlohi sasati atu la lo vereverera isara hasera lara, ‘Natuna tataholo nakerihi mo lo mai, vara řa vilimateia, řa pa lavi na koruna tari!’ ⁸La tauria, ale la vilimateia moiso la pulahia mo sahe na jingoiman rope atu.”

⁹Iesu mo usia isara mara, “Ka řom vara tamlohi tavera atu i pa vai na sava? A vereea tataholo isamim, i pa sinai i vilimateira enira mo isoiso, ale i pa sile isa atu isana tamlohi tinapua vara la mele pakaia. ¹⁰Varařuhu, ka sopo lo evi hinau nike na Retiulia?

‘Vatu atu tamlohi voro ima la lo tipahia,
enia mo mai tapulo pulo vatu mata ima.

¹¹Hinau atu Moli God hasena mo vaia.

Kama hitea vara mo řuhu jea.’ ”

Psa 118.22-23

¹²Tamlohi tatavera non Jew la opoia vara la taurilatia matan la hitevosahia vara Iesu mo lo vere titileu atu matan vara i pisuhira, pani la matahu vara la tauria matan la vao atu. Matan haratu, la malue atu, ale la rovo.

Ha Voli Na Takis

(Mt 22.15-22; Lk 20.20-26)

¹³Ale la řule na Pharisee hai peresi na tamlohi hai non Herod Antipas la vano isan Iesu matan vara la vaihitea vara i ori hin te nona retireti. ¹⁴Ale la mai isana la vereea lara, “Tija, kama levosahia vara engko ko lo varařuhu, ale ko sopo tametame na řomřomi nona tamlohi, matan ko sopo usuri na kilakilau nona tamlohi isana tamlohi aulu, pani engko ko lo vujangi na malele tataholo non God usuri na retivarařuhu.

Nomam retusia isam nahai, mo tataholo vara tavgavuın Israel la voli na takis isana supe nona mara Rome teni mo vono? Řa pa silea teni i toho?” ¹⁵Pani Iesu mo levosahi na nora tapnetano, ale mo vereea isara mara, “Mata sava ka lo vaihiteau sohena? Ha lavi te selen hatea i mai isaku a hitea.” ¹⁶Ale la lavi matea la silea isana moiso mo usia isara mara, “Niniun hare nahai, ale hijan hare nahai la ulia hin selen nike?”

Lara, “Nahon supe nona mara Rome.”

¹⁷Ale Iesu mo vereea isara mara, “Ale ha sile na hinau non supe nona mara Rome isan supe nona mara Rome, ale hinau non God isan God.”

Ale lara la rongo mo řaramira sohena, la mařurahi tavera hinia.

Vujangi Mata Sauteterahi Na Mateia

(Mt 22.23-33; Lk 20.27-40)

¹⁸Ale Sadducee hai la mai isan Iesu, enira vao matea na Jew sei la sopo rasua vara God i pa sauteterahi na tamlohi na mateia. La mai isana la usia na retusia matea lara, ¹⁹“Tija, Moses mo ulia mara vara tamlohi lahi matea mo mate, pani narouna mo sopo vasusu, tasina i pa lavi na malepuna i mai narouna matan vara hařai atu i eři lavi te natun tavaina.

Deut 25.5

²⁰Tuai, vorai mo limaravrua la lo toho. Ale vora tiroma mo lavi na hařai matea, pani mo sopo lo te natuna, ale mo mate. ²¹Vora usuria mo pete lavi hařai atu, pani enia sohena mo mate, mo sopo te natuna. Hatolura mo pete lavia, ale mo mate mo sopo te natuna. ²²Mo sohena mo tikeli na vora hitahu, ale enira mo isoiso la mate. Hařai atu sohena mo mate, pani mo sopo te natuna. ²³O to vere kamam hinia vara hařai atu i pa naroun hare na pongi sauteterahi matan enia mo lahi isan la vorai atu enira mo isoiso.”

²⁴Iesu mo vereea isara mara, “Nomim řomřomi mo sopo tataholo, matan ka sopo levosahi mamahuni na Retitapu teni na suihan God! ²⁵Matan hin

rani atu tamlohi la pa mele turu na mateia, la pa sopo mele lahi, pani la pa sohena angelo na tuka. ²⁶Pani hin vujangi sei mata sauteterahi na mateia, korong ka sopo lo evia matan vipahai rihirihi atu sei Moses mo hite na hapu mo lo hani hinia? God mo vereea isan Moses mara, ‘Enau God non Abraham, God non Isaac, ale God non Jacob.’ *Exo 3.6*

²⁷God enia mo sopo God nona tamlohi mate, pani nona tamlohi mauri, matan isana, tamlohi tari la lo mauri. Kamim ka jalio mo tavera.”

Retileu Atu Mo Jeu Na Tinapua

(Mt 22.34-40; Lk 10.25-28)

²⁸Ale hin rani atu tamlohi vujangi mata leu matea mo mai mo lo tapurongo na vauriuri nona Sadducee, ale mo rongo sohena sava Iesu mo řaramira sei mo řuhu jea, ale mo usi Iesu hinia mara, “Sava leu natu mo aulu mo jeu na leu tari?”

²⁹Iesu mo řaramia mara, “Leu atu mo aulu mo jeu na leu tari enia vara, ‘Israel, ha tapurongo! Moli nořa God, enia Moli matelete. ³⁰O pa opoi Moli nom God vevuhi na mapum, na maurim, na řomim, peresi na suiham.’ *Deut 6.4-5*

³¹Ale haruana enia nahai, ‘O opoi na tahisam sohen ko lo opoiho hasem.’ Moiso mo sopo mele te leu tinapua i aulu i jeu la leu sei mo rua.” *Lev 19.18*

³²Tamlohi vujangi mata leu atu mo vereea mara, “Tija, ko varařuhu vara God enia matelete purongo, ale mo sopo mele te tinapua. ³³Ale mo tataholo vara řa opoi vevuhia na mapuřa, na řomiřa, na suihařa, ale vara řa opoia na tahisařa sohena řa lo opoiřa haseřa. La leu akerihi la aulu la jeu na maji tari mata malamalai řa lo sulira na nořa silesilea isan God usuri na leu.” *Hos 6.6*

³⁴Iesu mara mo hitevosahi na lelevosahi non tamlohi akerihi, mo vereea isana mara, “Engko ko lo toho mariviti moiso hin mauri atu God mo aulu hinia.”

Ale hitahun haratu, mo sopo te vonara hatea i mele opoia vara i usia hin te retusia hatea.

Křisto Enia Natun God

(Mt 22.41-46; Lk 20.41-44)

³⁵Na rani tinapua Iesu mo lo vujangi na tamlohi na lolo rope Temple, mo lo vereea isara mara, “Sohena sava natu, tamlohi vujangi mata leu la lo vereea vara Křisto enia natun Supe David? ³⁶Na lo usia sohena matan tuai David mo retireti na suihan Tanume Tapu mo vereea mara,

‘Moli God mo vereea isan noku Moli mara:

O sakele na matuaku,

o lo sasaovi i mai i tikeli

a tau na nom meresahi
na ruhuruhu palom.’

Psa 110.1

³⁷David sohena mo tovia ‘Moli’. Vara mo sohen haratu, sohena sava natu, Křisto enia natun David?”

Ale vao tavera atu la avulahi tavera vara la lo tapurongo na nona vujangi.

Vujangi Mata Posposi Aulu

(Mt 23.1-36; Lk 20.45-47)

³⁸Iesu mo lo vujangira mara, “Ha lo kilau na tamlohi vujangi mata leu. Matan la lo opoia vara tamlohi la hitera la lo hahau peresi na nora ruru peravu, ale la opoia vara tamlohi la lo popovitoho isara na jara maket.

³⁹La opoia vara la lo sakele nahonaho tarea na lolo ima lotu teni na rani matan te hanhani tavera. ⁴⁰Ale la lo haluhalu na hařai malepu mata voli nařihi na imara na volina makomona purongo, pani la lo tatavu horo na nora posposi sasati na usiusi peravu na naho tamlohi. Matan hinau atu, nora talai i pa mele tavera jea.”

Malepu Tilavono Matea

(Lk 21.1-4)

⁴¹Iesu mo lo sakele mariviti na jara silesilea na Temple. Ale mo lo kilau na vao tamlohi la lo tau na nora mania. Tamlohi tavitav matuvana la tau na mania tavera hinia. ⁴²Mo sopo tuai mo hite na malepu tilavono matea mo mai, ale mo tau na nora mania, selen mo rua purongo. ⁴³Iesu mo tovi na nona tamlohi usuri la mai isana mara, “Varařuhu na vereia isamim, malepu tilavono nike, mo taua mo jeu na tamlohi tinapua tari sei la lo tau na nora silesilea nike. ⁴⁴Matan la haratu sei la silea mo tavera pani la levosahia vara nora tavitav tavera mo pa lo toho. Pani malepu tilavono nike mo sile vevuhi na sava mo lo toho mata maurina.”

Hinai La Pa Masese Hitahu

(Mt 24.1-2; Lk 21.5-6)

13 ¹Iesu mo pa lo malue na Temple, ale nona tamlohi usuri matea mo vereia isana mara, “Tija, o to kilau vano sevano hin la vatu tavera sevano la voro na roro ima hinira, ale o to kilau la ima tatavera sevano!”

²Ale Iesu mo vereia isana mara, “Ko lo hite ima tavera nike? I pa sopo te vatu hatea i pa lo toho aulu na vatu tinapua vara la pa sopo atu jovjovira.”

Rani Řilangi La Pa Mai

(Mt 24.3-14; Lk 21.7-19)

³Ale hitahu, Iesu mara mo lo sakele na pahisa Vuti talu Olive mo lo kilau sivo na Temple, Peter, James, John enia Andrew la mai řořo hasera,

ale la usia lara, ⁴“O to vere kamam hinia, la hinau sei la pa masese pangisa? Ale sava matamata atu i pa mai tiroma vara kama pa levosahi mamahunia vara i sopo tuai natu la hinau tari natu la pa masese?”

⁵Iesu mo vere isara mara, “Ha lo kilau i řuhu! Mo sopo řuhu vara tea i halu kamim. ⁶Matuvana la pa mai na hijaku. La pa vere vara, ‘Enau natu, tamlohi atu!’ ale la pa halu na tamlohi matuvana. ⁷Ale vara ka rongo te vuro teni sorasora mata vuro, řomim i sopo kaka hin la hinau sei la pa mai tiroma, pani mo sopo isoisona. ⁸Mara jara tavera tinatinapu la pa lo meresahi hinira, ale supe matea i pa meresahi na supe tinapua. Ale mihi i pa hisuhi na tatua jara na varama. Tamlohi la pa marohati na marua. Pani la hinau sei enira tapulona purongo. La hinau tari sei la sohena tapulo rongohaji na epe hařai vara i lavilavi. ⁹Ha lo kilau! Tamlohi la pa tauri kamim la pa ari kamim. La pa hamaji kamim na ima lotu. Ha pa turu na naho tamlohi aulu nona gavman peresi na naho supe matakū. Enia i pa masapamim matea vara ha eři vere isara vara enau hare. ¹⁰Retiřuhu atu la pa retivujavujangia na jara tari na varama tiroma, moiso isoisona i pa mai. ¹¹Ale vara la lavi kamim la vai kamim ka turu na nahora vara la vaihite kamim, ha sopo řomkaka na sava ha pa vere, pani ha pa vere na sava God i pa silea isamim, matan i pa sopo kamim ka lo retireti pani Tanumen God hin kamim.

¹²Vorai matea i pa turuposi hin voraina vara i mate. Tama i pa turuposi hin natuna. Natuvarihī la pa turuposi na tamara peresi na tinara la pa vaira tamlohi la vilimateira. ¹³Tamlohi tari la pa řohu hin kamim matakū. Pani haratu mo turu řilangi mo tikeli na isoisona i pa juri.

Hina Lumihā Matea Na Lolo Temple

(Mt 24.15-21; Lk 21.20-24)

¹⁴Rani matea i pa mai ha pa hite hina lumihā atu God mo lo řohu hinia i pa turu na jara tapu na lolo Temple. *Dan 9.27; 11.31; 12.11* Hare mo evi harihi, i lo lelevosahi na řaramina! Hin rani atu, i pa řuhu vara tamlohi hin Judea la rovo la sahe na vutivuti.

¹⁵I pa řuhu vara haratu mo lo toho na pusa ima, i sopo mele unu na lolo ima vara i lavi te hinau hinia, ¹⁶ale i pa řuhu vara haratu mo lo voko na isana i sopo mele posi i sivo mata i lavi na nona ruru na lepa. *Lk 17.31*

¹⁷Hin rani atu, i pa řilangi jea isana hařai mo tau natuna, teni te hařai mo lo vasusui te natuna. ¹⁸Ha usiusi vara rani atu i pa sopo masese na taro hamariri.

¹⁹Rani sati tavera atu i pa jeu na rani sati tamlohi la lo hitera mo tapulo hin rani atu God mo vai na varama mo tikeli nake i pa sopo mele te rani sasati i sohena hin te rani. *Dan 12.1; Rev 7.14*

²⁰Vara Moli God i sopo vai rani řilangi atu i vejuveju, i pa sopo tea i eři juri, pani mata nona tapuhi, la haratu sei mo viřonira i pa vai rani atu i vejuveju.

²¹Hin rani atu, vara tea mo vere a isamim vara, ‘Ha kilau nike, Křisto nahai!’ Teni tea i pa vere a vara, ‘Ko hitea, enia nahai!’ Pani ha sopo rasura. ²²Matan křisto haluhalu peresi na tamlohi tapu haluhalu la pa mai. La pa vai na matamata tatavera. La pa vaihite la tamlohi atu God mo viřonira moiso vara la tinařihi na nora rasua. ²³Ha lo kilau! Enau na lo vere kamim hinia tiroma moiso.

Natun Tamlohi I Pa Mai
(Mt 24.29-31; Lk 21.25-28)

²⁴Moiso hitahu hin rani sasati atu,
‘Alo i pa řořoha, ale vitu i pa sopo mele sile na merana.’ *Isa 13.10*
²⁵‘Vitusarasara la pa jovjovi na masapa,
ale suiha tari na masapa la pa hisu.’ *Isa 34.4; Joel 2.10*
²⁶Hitahuna natu, tamlohi tari la pa hite na Natun Tamlohi mo lo mai na telangi na suiha tavera peresi na merana tavera.

Dan 7.13

²⁷Natun Tamlohi i pa řule na nona angelo la vano řalihi na varama vara la takonahi na nona tapuhi na jara tari na varama, ale aulu na masapa.

Tea Mo Sopo Levosahia
(Mt 24.32-35; Lk 21.29-33)

²⁸Ha levosahi na posi vipahai fig sei julina la mai la malum, ale mo tivu, ka levosahia vara rani mata hulihuli mo pala. ²⁹I pa sohena na pongi hitahu vara ka hite na hinau tari sei na lo vere kamim hinira moiso. Ha pa levosahia vara i sopo tuai Natun Tamlohi i pa pala.
³⁰Varařuhu na vere a isamim, pina akerihi nake i pa sopo lo mate vevuhi vavano la hinau tari akerihi la pa masese. ³¹Tuka enia varama la pa tihai, pani noku reti la pa toho jejeu.

Ha Tatamahu Tarea
(Mt 24.36-44)

³²Mo sopo tea i levosahi rani tataholo atu teni matan alo matana, angelo na tuka sohena, la sopo levosahia teni Natun Tamlohi. God Tama hasena mo levosahia. ³³Ha lo kilau! Ha sopo juruvi! Matan ka sopo levosahia vara pongi atu i pa pala pangisa!

³⁴I pa sohena tamlohi matea mo vano na nona hahau matea na jara tinapua matea, ale mo tau na imana na lima nona volitusi, ale la lo vai na nora vavahinau hatehateahi hinia. Ale mo vere haratu mo lo kilau na pelati mara, ‘O lo kilau tarea mata noku mele pala!’ ³⁵Matan haratu, ha lo kilau! Matan ka sopo levosahia vara tamlohin ima sei i pa mele pala pangisa, i eři pala na ravravi teni na livuha pongi, teni na toa tarere teni na řalavuhu, ha lo kilau! ³⁶Mo sopo řuhu vara ha hutu kamim na nona

pala, ale i vilei kamim ka lo juruvi. ³⁷Sava na vere kamim hinia, na vere a isamim kamim isoiso, ha lo kilau i řuhu mata nona rani pala!”

Jew La Aleale Malele Mata Taurilatia Hinia

(Mt 26.1-5; Lk 22.1-2; Jn 11.45-53)

14 ¹Rani mo rua mo lo toho vara i tikeli na pongi rani Passover peresi rani atu la lo hani na pereti hinia sei mo sopo te isi hinia. Pńis aulu peresi na tamlohi vujangi mata leu la lo aleale malele vara la pa tauri luhu Iesu hinia vara la vilimateia. *Exo 12.1-27*

²Matan lara, “Řa sopo eři vaia hin rani tavera sei matan tamlohi la pa levutiřa.”

Hařai Matea Mo Rengi Na Hasori Hin Iesu

(Mt 26.6-13; Jn 12.1-8)

³Iesu mo pa lo toho Bethany na iman Simon, tuai enia tamlohi lepros matea, ale lara la pa lo hanhani na tep, hařai matea mo sinai isana, mo lavi na potele hasori matea la vaia na lepa hijana alabaster, hasori řuhu mo lo toho na lolona la tovia nard ponana mo řuhu ale volina mo aulu jea. Hařai atu mo lavia mo kosahi na řalo potelena, ale mo rengia na patun Iesu. ⁴Tamlohi hai la lo toho atu la rongo mo sati matana, la lo vere isara hasera lara, “Mata sava mo rengi komokomoi hasori sei sohena? ⁵Volina mo sohena voli voko nona tamlohi matea mata tauni matea! Vara i hařehia i pa eři sile na volina isana tilavono.” La savurahi hařai atu.

⁶Pani Iesu mo vere mara, “Eh, ha tinařihi hařai sei. Mo lo vai na hina řuhu matea isaku. ⁷Tamlohi tilavono la pa lo toho tarea isamim, ale vara ka opoia ha pa eři tuenira. Pani enau, a pa sopo toho tarea isamim. ⁸Hařai nike mo vai na sava i eři vaia isaku. Mo rengi na hasori na epeku mo vaia mo tatamahu mata noku tavuni mata noku mateia. ⁹Varařuhu na vere isamim, sava hinau hařai nike mo vaia isaku la pa sorahia na jara tari na varama mata řomřomia vara la vere na Retiřuhu matakū.”

Judas Mo Turuposi Hin Iesu

(Mt 26.14-16; Lk 22.3-6)

¹⁰Judas Iscariot, vonan la tupu sangavulu řomana mo rua atu matea, mo vano isana pńis aulu nona tavitavin Israel, matan vara i tau Iesu na limara. ¹¹Pńis aulu la avulahi jea matana, ale la retitauhi vara la pa voli Judas matana. Judas mo tapulo aleale masapa vara i pa sile Iesu i vano isara hinia.

Hanhani Passover

(Mt 26.17-25; Lk 22.7-14, 21-23; Jn 13.21-30)

¹²Na rani tiroma mata pereti sei mo sopo te isi hinia sei la lo sile na natu sipsip mata Passover sohen malamalai hinia, tamlohi usuri non Iesu

la vereea isana lara, “Eh! Ko opoia vara kama pa tatamahu mata hani na Passover epu?”

¹³Mo řule na nona tamlohi usuri tupra rua, mo vereea isara mara, “Ha vano ha unu Jerusalem, ale ha pa hite na tamlohi matea mo lo soloti na jara wai tavera matea, ale ha usuria. ¹⁴Ale sava ima i pa unu hinia, ha vere na tamlohin ima atu vara, ‘Tija mo usia mara, sava jara ko tatamahunia moiso matakua vara a pa hani na Passover hinia peresi na noku tamlohi?’ ¹⁵I pa vujangi kamim na jara matea mo lo toho aulu hin ima atu. Mo tatamahuni na hinau tari moiso. Ha tatamahuni na hařa hinau ea.” ¹⁶La tamlohi usuri tupra rua atu la malue la sivo hin taon tavera atu, ale hinau tari mo masese sohena Iesu mo vereea, ale la tatamahuni na hanhani mata Passover ea.

Hare I Pa Turuposi

¹⁷Ale mara mo ravravi, Iesu mo sahe hin ima atu peresi la tupu sangavulu řomana mo rua atu. ¹⁸La sakele řalihi na tep la lo hanhani, ale Iesu mara, “Varařuhu, vonamim matea i pa turuposi hiniau, enia vonamim matea sei mo lo hanhani peresiau nakerihi.” *Psa 41.9*

¹⁹Nona tamlohi la tapulo rongo mo sati, ale enira hatehateahi la lo usia isana lara, “Hare, enau teni mo vono?”

²⁰Iesu mo vereea mara, “Vonamim matea la tupu sangavulu řomana mo rua, ale enia mo lo seseri peresiau nakerihi. ²¹Matan Natun Tamlohi i pa vano sohena Retiulia mo vereea moiso matana. Pani rani sasati tavera isan tamlohi atu sei mo turuposi hiniau. I pa mele řuhu jea vara i sopo vora.”

Retitauhi Paro

(Mt 26.26-30; Lk 22.14-23; 1Co 11.23-25)

²²La pa lo hanhani, Iesu mo lavi na pereti, mo vere meje matana, mo topea mo silea isana nona tamlohi ale mara, “Ha lavia. Harihi enia epeku!”

²³Mo mele lavi na paniken waen, mo vere meje isan God matana, moiso mo silea isara, ale enira isoiso la inua hinia. ²⁴Moiso, mo vereea isara mara, “Harihi enia řaeku sei i pa roro mata tamlohi matuvana matan vara i vai na retitauhi paro non God peresi na nona tamlohi i turu. *Jer 31.31-34*

²⁵Varařuhu na vereea isamim, a pa sopo eři mele inu te waen i tikeli rani atu a pa mele inua peresi kamim hin mauri atu God mo aulu hinia.”

²⁶La lalavete na vete matea moiso, la malue la sahe na Vuti talu Olive.

Peter I Pa Vunvuni Iesu

(Mt 26.31-35; Lk 22.31-34; Jn 13.36-38)

²⁷Na malele Iesu mo vereea isara mara, “Kamim mo isoiso ha pa rovo hiniau, matan Retiulia non God mo vereea mara,

‘A pa vili na tavui sipsip.

Sipsip la pa rovo.’

Zec 13.7

²⁸Pani hitahu vara na mele turu na mateia, a pa vano tiroma hin kamim Galilee.”

²⁹Peter mo vere a isana mara, “Hina purongo vara enira mo isoiso la rovo hiniho, enau i vono!”

³⁰Iesu mo vere a isan Peter mara, “Varaʻuhuhu na vere a isam, o pa vunvuniau vaha tolu nohorihhi na vutepongi, moiso toa i pa tarere vaha rua.”

³¹Pani Peter mo reti ʻilangi mara, “Vara a pa mate peresiho, i pa sohena! A pa sopo eʻi vunvuniho!” Enira mo isoiso la vere a sohena.

Mo Usiisi Gethsemane

(Mt 26.36-46; Lk 22.39-46)

³²La sahe na jara la tovia Gethsemane, Iesu mo vere a isana nona tamlohi usuri mara, “Ha lo sakele nike tako. Enau a sahe a usiisi.”

³³Mo lavi Peter, James, John la vano peresia, ale mo tapulo rongo mo sati tavera jea, ale ʻomina mo sopo sakele. ³⁴Ale mo vere a isara mara, “ʻomiku mo jovi tavera vara a mate matana. Ha lo toho peresiau, ha sopo juruvi!”

³⁵Mo mele vano makomona, mo jovi sivo na lepa mo usiisi isan God mara vara te malele tinapua, i pa sopo vano hin nona rani ʻilangi nike.

³⁶Ale Iesu mara, “Tata! Tamaku! Ko eʻi vai na hinou tari. O lavi naʻihhi na noku rani ʻilangi nike, pani o sopo vaia sohena masaloku, pani sohena masalom.”

³⁷Mo mele sinai mo hite Peter la juruvi ʻomalihhi. Mo vere a isan Peter mara, “Simon, varaʻuhuhu ko lo juruvi? O sopo eʻi kilau peresiau matan te matan alo hatelete purongo? ³⁸Ha lo kilau! Ha lo usiisi, matan vara ha pa sopo jovi na vaihite. Tanumemim mo opoia vara i oloolo, pani masalomim mo ʻilangi jea.”

³⁹Moiso, mo mele sahe vara i usiisi, mo mele vere la nona reti atu tiroma. ⁴⁰Mo mele sinai, mo mele vileia vara la mele juruvi moiso, ale matan matara mo puhoni, la sopo eʻi ʻaramia.

⁴¹Iesu mara mo mele mai hatoluna, mo vere a isara mara, “Varaʻuhuhu ka pa lo juruvi, ka pa lo mapu? Mo isoiso natu, la tau Natun Tamlohi na lima tamlohi hehe natu. ⁴²Ha turu! Ra vano! Ka hitea, noku meresahi mo lo mai moiso.”

La Taurilati Iesu

(Mt 26.47-56; Lk 22.47-53; Jn 18.1-11)

⁴³Iesu mo pa lo retireti Judas vonan la tupu sangavulu ʻomana mo rua atu matea mo pala isara peresi na vao tavera matea, la mai la lo lavi na

sita mata valum peresi na nalnal. Pŕis aulu peresi na tamlohi vujangi mata leu peresi na vajiahara natu la řulera la mai isan Iesu. ⁴⁴Ale tamlohi atu mo lo turuposi hinia mo verera na matamata matea isara moiso mara, “Tamlohi atu a pa pungosia, enia tamlohi atu natu. Ha tauria, ha lavia i vano.”

⁴⁵Judas mo kakau jara atu, mo vano isan Iesu mo vereea mara, “Tija.” Ale mo pungosia. ⁴⁶Ale la tamlohi atu la mai la tauri Iesu. ⁴⁷Pani vonara matea sei mo lo turu atu mo lavi na nona sita vuro mo langai nařihi na pero volitusi non pŕis aulu.

⁴⁸Iesu mo vereea isara mara, “Ka mai peresi na sita peresi na nalnal sohena vara enau tamlohi vili tamlohi mata vavanaho matea? ⁴⁹Tarea na lo toho peresi kamim na lolo Temple na lo vujangi, pani ka sopo tauria. Pani i pa sohen harihi matan vara Retiulia i pa masese matakau.”

⁵⁰Nona tamlohi la malue isana, ale la rovo. ⁵¹Uluvou matea mo lo usuri Iesu, enia mo lavolavo purongo, ale la tauria, ⁵²pani la lo taurilati na nona ruru purongo, ale mo tinařihira mo rovo malamala.

Iman Pŕis Aulu

(Mt 26.57-68; Lk 22.54-55, 63-71; Jn 18.13-14, 19-24)

⁵³La lavi Iesu mo vano na iman pŕis aulu. Ale moli nona pŕis tari peresi na vajiahara peresi na tamlohi vujangi mata leu la matavuhi jara matea. ⁵⁴Ale Peter mo lo usuri Iesu asau makomona mo sivo vahatea na lolo ropen iman pŕis aulu atu. Mo lo sakele peresi la tamlohi kilau matan ima atu, la lo marijo na hapu.

⁵⁵Moli nona pŕis peresi la tamlohi tari mata council Aulu, la lo aleale tamlohi vara i vereuli te hinau hin Iesu matan vara la pa vilimateia matana, pani la sopo vilei tea. ⁵⁶Tamlohi matuvana la vai na retihalu hinia, pani nora retihalu la sopo matea. ⁵⁷Hai la turu sahe la retihalu hinia lara, ⁵⁸“Kama rongoa mo vereea mara, ‘Enau a pa viliroiroi Temple nike sei tamlohi la vaia na limara, moiso na rani i tolu purongo a pa mele voroa na hina tinapua sei tamlohi la sopo voroa na limara.’” ⁵⁹Pani mo sohen tiroma, nora řomřomi mo sopo matea.

⁶⁰Moiso nora pŕis aulu mo turu na livuhara, mo vereea isan Iesu mara, “Mo sopo te nom retireti vara o vereea matan la retireti nike? Sava nahai, la tamlohi nike la lo vereulia matam?” ⁶¹Pani Iesu mo sopo langati na jingona, ale mo sopo řaramia. Pŕis aulu atu mo mele usia vahatea mara, “Engko natu Křisto atu, Natun God teni mo vono?”

⁶²Iesu mo řaramia mara, “Enau natu, ale ha pa hite Natun Tamlohi i pa sakele na tavalu liman God na jara mata suiha, ale ha pa hite Natun Tamlohi i mele mai na telangi matan tuka.” *Dan 7.13*

⁶³Ale pŕis aulu mara mo rongoa sohena, mo hasena řari na nona ruru, ale mo vereea mara, “Mata sava řa pa lo mele aleale retireti vara řa pa tuvaia

hinia? Enia hasena mo vereea! ⁶⁴Ka pete rongo sohena sava mo vereea moiso vara enia God. Ha pa vai na sava?” Enira mo isoiso la vereea lara i mate.

⁶⁵Hai la tapulo litovia, hai la tatavuhoro na nahona la tutuhia, ale la usia isana lara, “Vara engko p̄rovet matea, o to vereea vara hare natu mo tutuhiho?” Ale tamlohi kilau sohena lara la lavia mo vano la tutuhia.

Peter Mo Vunvuni Iesu

(Mt 26.69-75; Lk 22.56-62; Jn 18.15-18, 25-27)

⁶⁶Hinau atu mo lo masee, Peter mo lo toho atano na lolo rope matan ima atu na jingoima. Ale volitusi hārai matea non p̄ris aulu mo mai, ⁶⁷mara mo hite Peter mo lo marijo, mo lo kilau mamahunia, ale mara, “Engko vonara matea ko lo usuri Iesu mara Nazareth!”

⁶⁸Pani Peter mo vunvunia, ale mara, “Na sopo levosahia teni a levosahi na sava ko lo vereea.” Mo malue atu mo vano mo turu na mataruan rope atu, ale toa mo tarere.

⁶⁹Pa hārai atu mo mele hite Peter mo lo turu atu ale mo vereea isana tamlohi mara, “Tamlohi aturihi enia vonara matea!”

⁷⁰Peter mo mele vunvunia.

Ale tamlohi hai la lo turu atu la vereea isan Peter lara, “Varāruhu engko vonara matea matan engko mara Galilee!”

⁷¹Pani Peter mo tapulo lesati hinia hasena, mo varakali ale mo vereea mara, “Na sopo levosahi tamlohi nike ka lo vereea.” ⁷²Ale vahatea purongo, toa mo tarere haruana. Peter mo mele řomřomi na reti non Iesu sei mara, “Engko o pa vunvuniau vaha tolu, moiso toa i pa tarere vaha rua.” Moiso řomin Peter mo jovi tavera, ale mo tangi tavera.

Iesu Enia Pilate

(Mt 27.1-2, 11-14; Lk 23.1-5; Jn 18.28-38)

15 ¹Na řalavuhu jea, moli mata p̄ris peresi na vajiahara tolu na tamlohi vujangi mata leu peresi na tamlohi mata council tari la matavuhi vara la vai te řomřomi. La lasi Iesu la lavia mo vano la taua na liman Pilate, tamlohi aulu nona gavman matan Rome.

²Ale Pilate mo usia mara, “Engko Supe nona Jew?”

Iesu mo vereea mara, “He'e, mo sohen ko vereea.”

³Moli nona p̄ris la tuvaia na retireti matuvana. ⁴Pilate mo mele usi Iesu vahatea mara, “Mata sava ko sopo talaira? Ko hitea, la lo tuvaiho na hina sati matuvana!” ⁵Pani Iesu mo sopo mele řaramia, ale Pilate mo māřurahi jea.

Pilate Mo Ari Iesu

(Mt 27.15-26; Lk 23.13-25; Jn 18.39–19.16)

⁶Tarea na hanhani tavera mata Passover, Pilate mo lo teri na tamlohi matea na ima řilangi sei enira la opoia. ⁷Vonara matea hin la haratu la lo toho na

ima řilangi hin rani atu, hijana Barabbas. Enia mo lo toho atu matan mo vilimateia na tamlohi matea na rani la turu mata valum mata jarara. ⁸Vao atu la mai isan Pilate ale la usia vara i mele vaia sohen tarea mo lo vaia isara. ⁹Ale Pilate mo usia isara mara, “Ka opoia vara a tinařihi Supe nona Jew nike teni mo vono?” ¹⁰Matan Pilate mo levosahia vara la pa lavi Iesu mo mai isana mata nora mereimerei purongo. ¹¹Pani moli nona pρίς la haluhalu na tamlohi mata usi Pilate vara i teri Barabbas na jaran Iesu. ¹²Ale Pilate mo mele usia isara vahatea mara, “Vara i sohena, a pa vai na sava hin tamlohi nike sei ka lo tovia vara enia Supe nona Jew?”

¹³La mele ngara lara, “O vosaea na talopeilopei!”

¹⁴Pilate mo mele usira hinia mara, “Sava hinau natu mo vaia mo sati?”

Pani la mele ngara mo řilangi jea lara, “O vosaea na talopeilopei!”

¹⁵Ale matan Pilate mo opoia vara i vai vao atu i avulahi, mo teri Barabbas sohen la usia. Ale mo retileu vara la rupi Iesu, moiso mo taua na lima tamlohi vuro nona mara Rome vara la vosaea na talopeilopei.

La Vailejeji Iesu (Mt 27.27-30; Jn 19.2-3)

¹⁶La tamlohi vuro atu la tiroma hin Iesu la unu na lolo nora patu ima mata vuro non Pilate. La tovi vevuhi na vao tamlohi vuro la mai na jara matea.

¹⁷La mai la rua na ruru perpel matea, ale la viriviri na asi ngařngariha matea sohena rongorongonona supe, ale la taua na patuna. ¹⁸La tapulo salute isana la lo vereea lara, “Tamlohi tavera, engko Supe nona Jew!” ¹⁹La lo tamaji na patuna na apo matea. La lo litovia, ale la lo popovitoho isana sohena vara la lo lotua.

²⁰Lara la kerehia moiso la mele lavi nařihi pa ruru perpel atu isana, ale la mele rurua na nona ruru. Ale la tiroma hinia la vano vara la vosaea na talopeilopei.

Simon Mara Cyrene Matea Mo Tueni Iesu

²¹Ale mara Cyrene matea, hijana Simon, enia tamana Alexander enia Rufus, mo pa lo tai purongo asau řove na jara vutivuti mo lo sinai na malele, ale la ngurunguru hinia vara i soloti na talopeilopei non Iesu.

La Vosae Iesu Na Talopeilopei (Mt 27.31-44; Lk 23.27-43; Jn 19.17-27)

²²La lavi Iesu mo sahe hin jara atu sei la tovia ‘Golgotha’, řaramin hija sei enia ‘Jara Sui Patu Tamlohi’. ²³La vaihitea vara la sile na waen la hoihoia peresi na myrrh, pani mo řohu hinia. ²⁴La vosae Iesu na talopeilopei, moiso la tamlohi vuro atu la roro mata nona ruru na taes matan vara la vileia vara hare natu i pa lavi na sava nona ruru. *Psa 22.18*

²⁵Matan alo mo limaravati na řalavuhu natu la vosaea na talopeilopei hinia. ²⁶La uli na reti matea mata nona aria na tavalu tapea matea la vosaea aulu na patuna mo vereea vara,

Supe Nona Jew

²⁷La vosae na tamlohi vili na tamlohi mata vavanaho tupra rua na tavalun Iesu. Matea na matuana, ale matea na marauna. *Isa 53.12*

²⁸⁻²⁹Tamlohi sei la lo hahau hin malele atu la lo taʻa sahe la lo kerehia, ale la lo pulapulahi na patura, la lo vereea lara, “Ko vara, vara o pa vilijovjovi na Temple, ale o eʻi mele vooa rani i tolu? *Psa 22.7; 109.25*

³⁰Vara mo sohena, o hasem juriho o sevuti hin talopeilopei sei!”

³¹Moli nona pʻris peresi na tamlohi vujangi mata leu sohena la lo vaivaia isara hasera lara, “Mo lo juri na tamlohi tinapua, pani enia i sopo eʻi hase juria! ³²Vara engko Kʻristo, Supe non Israel, o sevuti na talopeilopei nakerihi matan vara kama pa hitea ale kama rasuho!” La tamlohi atu sei la vosaera na pahisan Iesu sohena, la lo kerehia.

Iesu Mo Mate

(Mt 27.45-56; Lk 23.44-49; Jn 19.28-30)

³³Na livuha rani, ʻroʻroha tavera mo jovi mo tavuni na jara tari, mo lo toho mo tikeli na matan alo mo tolu na ravravi. ³⁴Na matan alo mo tolu, Iesu mo tangi na ulo tavera matea mara, “Eloe, eloe, lema sabbatani?” ʻRaramina reti sei enia ‘Noku God, noku God, mata sava ko posi na nahom isaku?’ *Psa 22.1*

³⁵Tamlohi hai la lo turu atu lara lo rongoa, lara, “Ka hitea! Mo lo tovi Elijah!”

³⁶Tamlohi matea mo maro mo vano mo lavi na tavalu ruru matea la ʻruʻunia na waen hohona mo pesia na apo matea, ale mo sohaia sahe isan Iesu vara i inua. Vonara matea mara, “Tako, ʻra pa hitea vara Elijah i pa mai i lavi naʻihia na talopeilopei i sivo atano teni i vono.” *Psa 69.21*

³⁷Iesu mo mele ulo tavera vahatea, ale maromaronona mo isoiso. ³⁸Ruru tavera atu mo lo toho horo na Jara Tapu atu na lolo Temple mo maʻari hasena tavaluna mo rua, mo maʻari mo tapulo aulu mo sivo atano.

³⁹Moiso captain mata tamlohi vuro atu sei mo lo turu tataholo na nahon Iesu, mara mo hitea sohena sava mo mate mo vereea mara, “Varaʻuhu, tamlohi nike enia Natun God tataholo!”

⁴⁰Haʻrai hai la lo turu asau makomona la lo kilau vano na talopeilopei. La haʻrai sei la tupu tolu, Mary Magdalene, Salome, Mary tinan uluvou sei James peresi Joses. ⁴¹La haʻrai sei la lo usuri Iesu na rani mo lo toho Galilee, ale la lo kilaua. Vao haʻrai matuvana sohena, enira tolu natu la lo usuria la sinai Jerusalem.

Joseph Mo Tavunia

(Mt 27.57-61; Lk 23.50-56; Jn 19.38-42)

⁴²La hinou sei la masese na Friday ravravi, enia rani mata tatamahu mata nora Sabbath. ⁴³Joseph mara Arimathea, enia tamlohi aulu matea mata nora

council tavera, ale enia matea sei mo lo kilau toho matan mauri atu God mo aulu hinia vara i pala. Ale řomina mo řilangi mo mai mo turu na nahon Pilate mo usia vara i lavi na tarapen Iesu. ⁴⁴Pilate mo rongoa vara Iesu mo mate vila, moiso mo mařurahi tavera matana. Pilate mo tovi na nona captain mata tamlohi vuro matea, mo usia mara, “Varařuhu, Iesu mo pete mate moiso?” ⁴⁵Captain atu mo vere Pilate hinia mara varařuhu mo mate moiso. Pilate mo vere isan Joseph mara i eři lavi na tarapen Iesu. ⁴⁶Joseph mo vano mo voli na ruru lulu matea. Mo juri na tarapen Iesu aulu na talopeilopei mo sivo atano. Mo leputia na ruru. Mo lavi na tarapen Iesu mo taua na papa vatu matea enia mo taia. Mo tai na pelatina vatu tavera matea vara mataruana. ⁴⁷Mary Magdalene enia Mary tinan Joses la hite jara atu la tau na tarapen Iesu ea.

Iesu Mo Mele Turu Na Mateia
(Mt 28.1-8; Lk 24.1-12; Jn 20.1-10)

16 ¹Saturday na ravravi jea na isoison rani mapu atu, Mary Magdalene, Mary tinan James enia Salome, la vano la voli te hasori řuhu vara la pa vano la taua na tarapen Iesu vara i mele rani sahe. ²Sunday řalavuhu jea alo mo pa lo tapulo vele purongo, la vano hin papa vatu atu. ³La pa lo vano la lo verevera isara lara, “Hare i pa tueniřa vara i kuresi nařihi vatu atu na mataruan papa atu?” ⁴Ale lara la tařa sahe aulu, la hite vatu tavera atu la pete kuresi nařihia moiso. ⁵La sahe la unu hin papa atu ale la hite na uluvov matea, mo ru na ruru lulu mo lo sakele na matuana, ale la hutura hinia. ⁶Ale mo vere isara mara, “Ha sopo matahu! Ka lo ale Iesu mara Nazareth haratu sei la vosaea na talopeilopei? Mo turu na mateia moiso, enia mo sopo toho nike. Ha to hite na jara sei la taua hinia. ⁷Pani ha vano ha vere isana nona tamlohi usuri peresi Peter, ha verera vara Iesu mo vano Galilee tiroma hin kamim moiso. Ha vano ha pa hitea ea sohen mo lo vere isamim tiroma moiso.”

⁸La hařai atu lara la malue la rovo hin papa atu matan matahu mo sohonira ale la savaravara. La sopo vere te hinau isan tea matan la matahu.

e Tiroma Isoison Mark –
(Mt 28.9-10; Jn 20.11-18)

Ale la vere vevuhi na hinau tari isan Peter peresi na tapalana. Hitahuna Iesu mo řulera la vano na varama, la vano Opae mo sivo mo tikeli Marino, la lavi nona Retiřuhu tapu mata juri sei mo lo sile na mauri tui sei i sopo eři tihai hin te rani. Amen.

e Harua Isoison Mark – Mary Magdalene

⁹Iesu mo mele turu na Sunday na řalavuhu jea, ale Mary Magdalene natu enia hařai tiroma mo hitea, enia natu Iesu mo titiu nařihi na tanume sasati mo limaravrua isana. ¹⁰Hitahu Mary mo vano mo vere

isana nona tamlohi usuri sei la lo ronggo mo sati ale la lo tangisia. ¹¹Pani lara la ronggo vara Mary mo hite Iesu mo mele mauri, la sopo rasua.

Nona Tamlohi Mo Rua La Hite Iesu
(*Lk 24.13-35*)

¹²Hitahun la hinau atu Iesu mo mele pala isana tupra rua sei la lo hahau mata jara tinapua matea, pani la sopo hitevosahia matan mo posi na nahona. ¹³Hitahuna lara la hitevosahia la mele hilu vilavila la sahe vara la vereea isana tatuara, pani tea i sopo rasura.

Iesu Mo Turu Na Livuhara
(*Mt 28.16-20; Lk 24.36-49; Jn 20.19-23; Acts 1.6-8*)

¹⁴Hitahuna Iesu mo pala isan la tupu sangavulu rōmana matea atu lara la lo hanhani. Ale mo reti rīlangi isara matan mo sopo te nora rasua, ale mata rōmira mo rīlangi jea. Mo reti rīlangi sohena matan la sopo rasu la haratu sei la hitea vara mo mele mauri.

¹⁵Ale mo vereea isara mara, “Ha vano na jara tari na varama, ale ha vereuli na noku Retirūhu isana tamlohi tari. ¹⁶Sava tamlohi mo rasua ale mo paptijo, God i pa juria, pani haratu mo sopo rasua, God i pa aria. ¹⁷God i pa sile la matamata tavera akerihi natu i usuri la haratu la rasuau: na hijaku la pa eři titiu nārihi na tanume sasati, ale la pa eři retireti na leo paro tinapua, ¹⁸ale la pa tauri na mata sasati jea na limara, ale vara la inu te wai mata vilimatei na tamlohi la pa sopo eři mate matana. La pa tau na limara na tamlohi rojoa moiso ale nora rojoa i tihai.”

Iesu Mo Sahe Aulu Na Tuka
(*Lk 24.50-53; Acts 1.9-11*)

¹⁹Iesu mara mo vere la hinau atu isara mo isoiso, God mo lavi nārihia mo sahe aulu na tuka, ale mo sakele na jara mata suiha na matuan God. ²⁰Ale nona tamlohi usuri la vano la retivujavujangi na jara hatehateahi. Moli Iesu mo lo tuenira na nora vavahinau, ale mo vujangia vara nora reti mo tai isana na matamata matuvana.